



СИБЭТИЭЙ ИОАННА АРЫЛЛЫЫ

Аан тыл

1 Сотору кэминэн туох буолуохтаабын кулуттарыгар биллэрээри Танара биэрбитин Иисус Христос арыйан көрдөрбүтүн туһунан кинигэ. Кини ону барытын Аанньалынан ытан, кулутугар Иоанна биллэрбитэ. ² Онон Иоанн Танара тылын, Иисус Христос туоһулаабыт кырдыгын — тугу көрбүтүн барытын кэрэ-хилээн суруйда. ³ Бу билингини да, кэнэбэни да төлкөлүүр тыллары ааҕар киһи уонна кини ааҕарын истэн бу кинигэбэ суруллубуту тутуһааччылар алгыстаахтар. Болдьохтоох кэм кэлэрэ чугаһаата.

Асиятаабы сэттэ церковка эбэрдэ

⁴⁻⁵ Асиятаабы сэттэ церковка Иоантан:

билигин да баар, урут да баар, кэлиэхтээх Танараттан уонна Кини бүрүстүөлүн иннигэр сылдыар сэттэ тыынтан итиэннэ сир ыраахтаабыларын Улуу Баһылыгыттан, өлбүттэртэн бастагынан тиллибит кырдыктаах туоһу Иисус Христостан эһиэхэ Танара илгэлээх үтүөтэ, илэ-эйэтэ тосхойо туруохтун! Киниэхэ, биһигини таптаан аһыыбытыттан-харабытыттан Бэйэтин Хаанынан сууйбукка*, ⁶ Аҕатыгар Танараҕа анаан биһигини ыраахтаабы, Танара үлэһитэ дьон онорбукка, үйэттэн үйэбэ албан аат буолуохтун, Кини быһааһа үйэлэр тухары туругура туруохтун! Аминь.

* ^{1:4-5} *Аһыыбытыттан-харабытыттан Бэйэтин Хаанынан сууйбукка* — сорох былыргы гректии илиинэн суруйууга «аһыыбытыттан-харабытыттан Бэйэтин Хаанынан быһаабыкка».

⁷ «Көр бу, Кини былыты кытта кэлэн иһэр! Харахтаах эрэ барыта, бэл Кинини хараҕалы аспыттар кытта, Кини кэлэрин көрүөхтэрэ; сир норуота барыта Кини иннигэр ытаан-сонгоон айманаҕа». Дьинг чахчы оннук буолуоҕа, аминь.

⁸ «Мин Альфабын уонна Омегабын, төрүппүн итиэннэ бүтэр уһукпун»*, — диир билигин да, урут да баар, кэлиэхтээх Айыы Тойон, Барытын Тутан Олорооччу.

Христону көрүү

⁹ Мин, Иоанн, эһигини кытта бииргэ Иисус Христос туһугар эрэйдэнэр, Кини Саарыстыбатыгар кыттыгастанар, Киниэхэ тулуурдаахтык эрэнэр убайгыт, Тангара тылын уонна Иисус Христону кэрэһиттээбитим иһин, Патмос диэн арыыга көскө ытыллыбытым. ¹⁰ Айыы Тойон күнүгэр Сибэтиэй Тыын миэхэ сайан, кэннибэр турба дорҕоонун санатар улахан сананы истибитим: «Мин Альфабын уонна Омегабын, Бастакыбын уонна Тийэхпин**.

¹¹ Тугу көрөргүн барытын кинигэҕэ суруйан Асиятааҕы сэттэ церковка: Ефескэ, Смирнаҕа, Пергамга, Фиатирата, Сардиска, Филадельфия уонна Лаодикияҕа — ыт», — диэбитэ ол санга.

¹² Ким миигинниин кэпсэтэрин көрөөрүбүн эргиллибитим — арай умайа турар сэттэ кыһыл көмүс сибэтиинньик көстүбүтэ; ¹³ сэттэ сибэтиинньик быһыгар бэрбээкэйигэр тийэр уһун таһаастаах, кыһыл көмүс өгнөөх таһаһынан түөһүн курдуу бааммыт Кини Уолугар майгыннаах баара. ¹⁴ Баттаҕа үрүн бараан түүтүнүү хаар маһан этэ, хараҕа умайар уот төлөнүн санатара; ¹⁵ атаҕа кыһаҕа уһаарыллыбыт боруонса курдуга; куолаһа күүстээх күрүлгэн уута күрүлүүрүн санатара; ¹⁶ уһа илиитигэр сэттэ сулуһу тутан турара, уһугар икки өттүнэн биилээх уһуктаах батастааҕа; сирэйэ халлаан оройугар турар күлүмнэс күн курдуга.

¹⁷ Мин Кинини көрөн, өлбүттүү атаҕын аттыгар охтон түспүтүм. Кини, уһа илиитин үрдүбэр ууран баран, эппитэ: «Куттаным. Мин Бастакыбын уонна Тийэхпин, ¹⁸ үйэттэн үйэлэр тухары

* 1:8 *Альфа уонна Омега* — грек алпаабытын бастакы уонна бүтэһик буукубалара. *Төрүппүн итиэннэ бүтэр уһукпун* — сорох былыргы гректии илиинэн суруйууга бу тыллар суохтар.

** 1:10 *Мин Альфабын уонна Омегабын, Бастакыбын уонна Тийэхпин* — сорох былыргы гректии илиинэн суруйууга бу тыллар суохтар.

АРЫЛЛЫ 2

баарбын. Өлбүтүм гынан баран, көр бу, аны үйэлэр тухары тыын-наахпын, аминь; аад уонна өлөр өлүү саарыстыбатын күлүүһүн тыла Миэхэ баар. ¹⁹ Онон тугу көрбүккүн, уонна билигин баары да, бу кэнниттэн туох буолуохтаагы да барытын суруй. ²⁰ Мин уҥа илиибэр көрбүт бу сэттэ сулуһун итиэннэ сэттэ кыһыл көмүс сибэтиинньик кистэлэн суолталара манньк: сэттэ сулус сэттэ церковь Аанһаллара буолаллар, оттон бу көрбүт сэттэ сибэтиинньигин сэттэ церковь буолар».

Ефескэ илдьит

2 Ефес* церковын Аанһалыгар суруй:
«Уҥа илиитигэр сэттэ сулуһу Тутан Турааччы, сэттэ кыһыл көмүс сибэтиинньик быһынан Хаамааччы манньк этэр: ² Эн бары дьайыгыҥ, сыралаах үлэҕин, кытаанах тулуургун билэбин; содур дьону кыайан тулуйбаккын, Апостол буолбатах эрээрилэр, Апостолларбыт дэнээччилэри тургутан көрөн, сымыйаларын арыйбыккын эмиэ билэбин. ³ Эн эрэи энээргинэн тэлэнгин, бөбө тулуурдаммытын, Мин аатым туһугар элбэх сырагыҥ биэрэн туран үлэлээбитин, ол үрдүнэн эр сэниэн эстибэтэҕэ. ⁴ Арай бири утарардаахпын: эн маннайгы тапталгыҥ сүтэрдин. ⁵ Онон хантан түспүккүн өйдөө, уонна аһыгыҥ-буруйгун билинэнгин, маннай утаа онорбут дьайыларгыҥ онор. Аһыгыҥ билинэн кэмсиммэтэххинэ, бэрт сотору эйиэхэ тийэммин, сибэтиинньик-кин турар сириттэн сыбарытыам. ⁶ Ол эрэри хайгыырдаахпын: эн эмиэ Мин курдук николантар дьайыларын абааһы көрөҕүн.

⁷ Тыын сэттэ церковка тугу этэрин истэр кулгаахтаах иһиттэҕэ буолуохтун. Кыайыылаахха Танара ырайыгар үүнэн турар олох аал луук маһын отонуттан сиирин көнүллүөм».

Смирнаҕа илдьит

⁸ Смирна** церковын Аанһалыгар суруй:

«Бастакы уонна Тийэх, өлөн баран Тилибит манньк этэр: ⁹ Эн бары дьайыгыҥ, эрэи-муну көрөргүн, дьаданыгыҥ (дьингэр эн баайгыҥ), иудейдарбыт дэнээччилэр эйигин холуннаралларын

* ^{2:1} Ефес — Еф 1:1 быһаарыытын көр.

** ^{2:8} Смирна (билигин Измир) — Ефестэн 56 км хоту сытар, Эгейскэй муора кытылыгар турар улахан эргин куората.

АРЫЛЛЫЫ 2

билэбин; кинилэр иудейдар буолбатахтар, сатана муспут дьон-норо буолаллар. ¹⁰Тулуйуохтаах эрэйгиттэн куттаныма. Адьарай эһигини холоон көрөөрү, сороххутун хаайыыга бырахтарыаҕа. Уон күн устата эһиги эрэйи-муну көрүүххүт. Өлүөххэр диэри, Миэхэ бэриниилээх буол, оччоҕо Мин эйиэхэ кыайыыны иһин Олох мэнньиэһин биэриэҕим.

¹¹Тыын сэттэ церковка тугу этэрин истэр кулгаахтаах иһиттэ-ҕэ буолуохтун: кыайыылаахха иккиһин өлөр куттал суоһаабат».

Пергамна илдьит

¹²Пергам* церковын Аанньалыгар суруй:

«Икки өттүнэн сытыы биилээх батастаах манныгы этэр: ¹³эн бары дьайыыны билэбин. Төһө да эн сатана бүрүстүөлү турар сиригэр олордоргун, Мин ааппын түһэн биэрбэтэҕин, бэл эһиэхэ — сатана олоҕор сиригэр — эрэллээх кэрэһиппин Антипаны өлөрбүт күннэригэр Миэхэ итэҕэлгиттэн аккаастамматаҕын.

¹⁴Ол гынан баран утарардаахпын: Израиль уолаттарын аныыга уккуйар туһуттан, кинилэри эмэгэҕэ туттуллубут аһы аһырга, содурдук быһыыланарга кучуйардыы Валаагы үөрөппит Валаам үөрэбин тутуһааччылар итиннэ эйиэхэ бааллар. ¹⁵Ону сэргэ, Мин абааһы көрөрбүн, николаиттар үөрэтиилэрин тутуһааччылар эмиэ эйиэхэ бааллар. ¹⁶Аныыгы билин; билиммэтэххинэ, бэрт сотору эйиэхэ тийэммин уоспар сылдьар батаһынан кинилэри кытта кыргыһам.

¹⁷Тыын сэттэ церковка тугу этэрин истэр кулгаахтаах иһиттэ-ҕэ буолуохтун: кыайыылаахха кистэммит мааннаттан амсатыам, санга аат суруллан сылдьар үрүн тааһын туттарыам; тааһы ылар кийиттэн ураты атын ким да ол ааты билбэт».

Фиатираҕа илдьит

¹⁸Фиатира* церковын Аанньалыгар суруй:

* 2:12 *Пергам* — Сардистан 80 км ыраах сытар куорат, Зевс тангараҕа уонна да атын тангараларга итэҕэл киинэ. Манна Рим императорыгар, тангараҕа курдук, сүгүрүйэллэрэ.

* 2:18 *Фиатира* — Пергамтан 65 км ыраах сытар Лидия куората. Бу эргинэн үрдүктүк сайдыбыт куората ордук пурпур тангаһы онорон таһаарарынан сураҕыра.

«Умайар уот төлөнүн курдук харахтаах, күлүмүрдэс боруонса курдук атахтаах Тангара Уола маннык этэр: ¹⁹эн бары дьайыыгын, тапталгын, үлэбин, итэбэлгин, кытаанах тулуургун итиэннэ кэлинги дьайыыларын маннайгыларгынааҕар ордук улаханнарын билэбин. ²⁰Ол эрэри утарардаахпын: пророкпун дэнэр Иезавель диэн дьахтар Мин кулуттарбын муннаран содурдук быһыыланарга, кэрэх аһылыгар эмэгэккэ туттуллубут аһы аһыырга үөрэтэрин бопсубаккын. ²¹Содур быһыытын билинэригэр бириэмэ биэрбитим үрдүнэн, билиммэтэ. ²²Онон кинини ыарыһах гынан, оронго-тэллэххэ быраҕыам, оттон аһыыны онгорсубут дьонун, кини содур дьайыыларыттан тэйбэтэхтэринэ, улуу кутурҕанна тиксэриэм. ²³Оҕолорун эмиэ имири эһитэлиэм; оччоҕо церковь эрэ барыта Мин киһи сүрэбин-быарын Курдат Көрөөччү буоларбын билиэ-бэ. Хас биирдигитигэр тугу онгорбуккутунаан көрөн төлүөм.

²⁴Оттон эһиэхэ уонна Фиатираҕа баар атын дьонго, ити үөрэҕи батыспатахтарга, „сатана дириг далайа“ диэн тугу ааттыылларын билбэтэхтэргэ, этэбин: атын ханнык да сүгэһэри эһиэхэ сүктэриэм суоҕа; ²⁵арай кэлиэхпэр диэри, туох баардааххытын ыһыктыман.

²⁶Кыайыылаахха, тигэбэр диэри Мин көңүлбүн толорооччуга, норуоттары баһылыыр былааһы биэриэҕим. ²⁷Оччоҕо кинилэри тимир торуосканан салайыаҕа, туой көһүйэлэри тоҕута сынньар курдук, үлтүрүтүөҕэ. Норуоттары баһылыыр былааһы Мин Аҕабыттан хайдах ылбыппынай да, кыайыылаахха эмиэ ол курдук биэриэҕим; ²⁸итиэннэ киниэхэ сарсыардаангы сулуһу туттарыаҕым. ²⁹Тыын сэттэ церковка тугу этэрин истэр кулгаахтаах иһиттэҕэ буолуохтун».

Сардиска илдьит

3 Сардис* церковын Аанһалыгар суруй:

«Тангара сэттэ тыынын кытта сэттэ сулуһу Тутан Турааччы маннык этэр: эн бары дьайыыгын билэбин — тыыннаах курдук ааттааххын-суоллааххын эрэри, дынгэр, өлбүккүн. ²Мин көрдөхпүнэ, эн суолун-иһинг Тангарам иннигэр энкилэ суох буолбатах эбит. Онон уһугун, туох ордон хаалбытын ситэри өлө

* 3:1 *Сардис* — Ефестэн илин диэки 50 км ыраах сытар куорат, Малай Азия биир саамай модун куораттарыттан биирдэстэрэ.

илигинэ, бөҕөргөт. ³Тугу ылыммыккын, тугу истибиккин өйдөө; ону барытын тутуһан туран аһыыгын билин. Уһуктубатахына, уоруйах курдук сэрэппэккэ, тийиэҕим; хайа кэмнэ тийэрбин билиэн да суоҕа.

⁴Ол эрээри итиннэ эйиэхэ, Сардиска, таһаһын киртиппэтэх хас да киһи баар; кинилэр толору холоонноох дьон быһыытыннан Миигин кытта үрүн таһастаах хаамсыахтара. ⁵Кыайыылаах үрүн таһаһы танһаа; Мин кини аатын-суолун олох кинигэ-титтэн сотуом суоҕа, кини аатын Аһам иннигэр, Аһам Аанһалларын иннилэригэр бигэргэтиэҕим.

⁶Тыын сэттэ церковка тугу этэрин истэр кулгаахтаах иһиттэ-ҕэ буолуохтун».

Филадельфияҕа илдьит

⁷Филадельфия* церковын Аанһалыгар суруй: «Сибэтиэй, Кырдыктаах, Давид күлүүһүн тылын Илдьэ Сылдыааччы, (Кини аспытын — ким да сабыа суоҕа, саппытын — ким да аһыа суоҕа) этэр: ⁸Эн бары дьайыыгын билэбин; көр бу, Мин эйиэхэ ааны тэлэччи астым, ким да бу ааны төттөрү сабар кыаҕа суох; күүһүн кыра да буоллар, Мин этэр тылбын тутустун, Мин ааппыттан аккаастамматын. ⁹Бу, сатана муспут дьонун, иудейдарбыт дэнээчилэри (дьингэр, кинилэр иудейдар буолбатахтар, сымыйалара), көр бу, кэлэн атаһар сүгүрүйэр онртоотохпуна, Мин эйигин таптыырбын билиэхтэрэ. ¹⁰Тулуурдаах буол диэн эппиппин толорбутун иһин, сир үрдүгэр олорооччулары барыларын тургутаары, бүтүн аан дойдуга аанһаан кэлэр ыарахан кэмнэ Мин эйигин араҥаччылаам. ¹¹Көр бу, Мин сотору кэлиэм; онон ким да эйигиттэн мэнһиэскин мүччү туттаран ылбатын туһугар, туох баардааххын ыһыктыма. ¹²Кыайыылааҕы Танһарам Дьэтин тирэх баһаната оностуоҕум, оччоҕо кини онтон хаһан даһаны киэр таһсан барыа суоҕа. Мин киниэхэ Танһарам аатын уонна халлаантан Танһарабыттан түһэр Танһарам куоратын, сана Иерусалим аатын итиэннэ Бэйэм сана ааппын суруйуом.

¹³Тыын сэттэ церковка тугу этэрин истэр кулгаахтаах иһиттэ-ҕэ буолуохтун».

* 3:7 *Филадельфия* — Сардистан соҕуруулуу-хоту диэки 40 км ыраах сытар кыра куорат.

Лаодикияға илдьит

¹⁴Лаодикия* церковын Аанһалыгар суруй:

«Эрэллээх, дынг кырдыктаах Туоһу, Тангара тугу айбытын барытын төрдө-төрүөтэ Аминь манньк этэр: ¹⁵эн бары дьайыгыгын билэбин: эн тымныта да, итиитэ да суоххун. Оо, арай тымны дуу, итии дуу эбитинг буоллар! ¹⁶Ону баара сылааскын эрэ, итиитэ да, тымныта да суоххун, онон Мин эйигин уоспуттан төлө ыһан таһаарыам. ¹⁷„Баайбын, дэлэйдик олоробун, аны туохпуна да тутайбаппын“, — дэнэбин даһаны, дынгэр, дьоло суоххун, муннааххын, дьаданыгын, хараһа суоххун, сыгыннааххын билбэккин. ¹⁸Онон байар туһугар Миигиттэн уокка ыраастаммыт кыһыл көмүһү, уонна таннаргар, сыгыннаах сылдыарын көстөн саакка-суукка киирбэтинг туһугар, манган тананы атылаһаргар, көрөр туһугар хараххын маанынан сотторгор сүбэлиибин. ¹⁹Таптыыр дьоммун, итэбэстэрин көрдөрөн туран, дьарыйабын, онон дьаныардаах буол, аныыгын биллин. ²⁰Бу кэлэн аанһытын тонсуйа турабын; ким Мин саһабын истэн аанын аспыкка дьизэтигэр киирэммин, киэһээнни аһылыгар олорсуом, кини эмиэ Миигин кытта бииргэ олорсуо. ²¹Кыайыылааһы Бэйэбин кытта бүрүстүөлбэр олордуом; Мин кыайан-хотон Аһабын кытта, Аһам бүрүстүөлүгэр олорбутум курдук, кыайыылаах эмиэ Миигинниин бииргэ олорсуо.

²²Тыын сэттэ церковка тугу этэрин истэр кулгаахтаах иһит-тэһэ буолуохтун».

Иоанн бүрүстүөлгэ олорор Тангараны көрөр

4 Бу кэнниттэн көрбүтүм, арай халлаанһа аан аһыллан тура-
ра. Били урут истибит турба дорҕоонун санатар саһам эмиэ иһиллэн: «Манна үөһэ таһыс, бу кэнниттэн туох буолуохтааһын эйиэхэ көрдөрүөм», — диэн ыһырбыта. ²Сонно миэхэ Сибэ-
тиэй Тыын сайбытыгар, мин халлаанһа бүрүстүөл турарын уонна ол бүрүстүөлгэ Ким эрэ олорорун көрбүтүм. ³Бүрүстүөлгэ Олорооччу яспис уонна сардис сарыалынан сыдыаһа сырдыы-
ра, бүрүстүөлү тула кустук түһэн изумруд өнгүнэн суһумнуура.

* ^{3:14}Лаодикия — Филадельфияттан соҕуруулуу-арҕаа диэки 40 км ыраах сытар куорат; Фригия саамай баай куората.

⁴ Көрдөхпүнэ, тулатыгар өссө сүүрбэ түөрт бүрүстүөл турара, ол бүрүстүөллэргэ сүүрбэ түөрт ытык кырдыаҕас олороро. Кинилэр үрүн танастаахтара, төбөлөрүгэр кыһыл көмүс мэнньиэстээхтэрэ. ⁵ Бүрүстүөлтэн чабылҕан чабылыһара, этинг этэрэ, саҥа-ингэ иһиллэрэ. Бүрүстүөл иннигэр Танара сэттэ тыына буолар сэттэ сибэтиинньик умайа турара, ⁶ курустаал курдук дып-дьэнкир өс-түөкүлэ муора килбэйэ сытара; бүрүстүөл ортотугар да, тулатыгар да — иннигэр-кэннигэр элбэх харахтаах түөрт харамай баара.

⁷ Бастакы харамай хахайга, иккис харамай оҕуска майгынныһыра, үһүс киһи курдук сирэйдээҕэ, төрдүс көтөн иһэр хотойу санатара. ⁸ Бу түөрт харамай биирдии бэйэлэрэ эргиччи алталыы кынаттаахтара, ис өттүлэрэ бүтүннүү харах этэ. Кинилэр түүннэри-күннэри тохтоло суох: «Билигин да баар, урут да баар, кэлиэхтээх Айыы Тойон Танара, Барытын Тутан Олорооччу — сибэтиэй, сибэтиэй, сибэтиэй!» — диэн ыллыыллара.

⁹ Харамайдар бүрүстүөлгэ Олорооччуна, үйэлэр тухары Тыыннааҕы айхаллаан, ытыктаан туран махтанан ыллаатахтарына, ¹⁰ сүүрбэ түөрт ытык кырдыаҕас бүрүстүөлгэ Олорооччу иннигэр сөһүргэстии түһэн үйэлэр тухары Тыыннаахха сүгүрүйэллэрэ уонна мэнньиэстэрин устан бүрүстүөл иннигэр уура-уура этэллэрэ: ¹¹ «Дьин сөп, Айыы Тойон, Эн албан ааты, үрдүк чиеһи ыларын, модун кыаххын айхаллатарын — барытын Эн айбытын, барыта Эн көнүлгүнэн баар буолбута, Эн көнүлгүнэн айыллыбыта».

Сэттэ бэчээттээх кинигэ уонна Агнец

5 Бүрүстүөлгэ Олорооччу уна илиитигэр иһэ-таһа суруктаах, сэттэ сиринэн эпсэри бэчээттээх кинигэни көрбүтүм. ² Онтон көрдөхпүнэ, арай биир сүдү күүстээх Аанһал: «Бу кинигэни бэчээтин көтүрэн арыһар кыахтаах ким баарый?» — диэн ньиргиэрдээх куолаһынан ыйыппыта. ³ Онуоха халлаанҥа да, сиргэ да, сир анныгар да бу кинигэни арыһан иһин көрөр кыахтаах ким да көстүбэтэҕэ. ⁴ Кинигэни арыһан ааҕар, мунсаатар иһигэр туох баарын көрөр кыахтаах ким да көстүбэтэҕиттэн мин уйа-хайа суох ытаабытым. ⁵ Ытык кырдыаҕастартан биирдэстэрэ миэхэ туһаайан эппитэ: «Ытаама. Көр эрэ ол, Иуда аҕатын ууһуттан төрүттээх хахай, Давид силиһэ, кыайыылаах таҕыста, онон кини бу кинигэни арыһар, сэттэ бэчээтин төлөрүтэр кыахтаах».

⁶Онно көрө түспүтүм, арай бүрүстүөлү тула турар түөрт харамай уонна ытык кырдыаҕастар ортолоругар толук туттуллан өлөрүллүбүт курдук дыһуннээх, сэттэ муостаах, Танара сири-дойдуну тилийэ ыппыт сэттэ тыына буолар сэттэ харахтаах Агнец турара. ⁷Кини баран бүрүстүөлгэ Олорооччу унга илииттэн кинигэни ылбыта. ⁸Кинигэни ылбытыгар түөрт харамай уонна сүүрбэ түөрт ытык кырдыаҕас Кини иннигэр сөһүргэстии түспүттэрэ; кинилэр хас биирдиилэрэ арфалаах уонна кыһыл көмүс иһиккэ толору кутуллубут үчүгэй сыттаах фимиамнаах этилэр (фимиам — сибэтиэйдэр* мэлиппэлэрэ). ⁹Кинилэр ханан да ыллана илик санга ырыаны ыллаабыттара: «Эн бааргын кинигэни ылар, бэчээтин төлөрүтэр Улуу Кыахтаах! Эн толук сиэртибэ буолбутун, хас биирдии биис уустан, тылтан, норуоттан, омуктан биһигини** Танараҕа анаан Хаангынан толуйбутун, ¹⁰Танарабытыгар анаан биһигини ыраахтаабы, Танара үлэһитэ онорбутун — онон биһиги сир үрдүгэр ыраахтаабылыахпыт***».

¹¹Онтон бүрүстүөл, түөрт харамай уонна ытык кырдыаҕастар тула көй элбэх Аанһал баарын көрбүтүм, саналарын-ингэлэрин истибитим; ахсааннара үтүмэн-үгүс, аата-ахса биллибэт этэ. ¹²«Сиэртибэҕэ бэриллит Агнец мунутуур кыабы, балысхан баайы, муударай өйү, модун күүһү, үрдүк чиэһи, албан-ааты, алгыһы ылара сөрү-сөптөөх!» — дэһэр күүстээх саналара дуораһыйан иһиллэрэ. ¹³Онтон иһиттэхпинэ, халлаанга да, сиргэ да, сир анныгар да, муораҕа да баар — айыллыбыт эрэ барыта: «Бүрүстүөлгэ Олорооччуга уонна Агнецка үйэттэн үйэҕэ алгыс, үрдүк чиэс, албан аат буолуохтун, Кинилэр баһылыыр былаастара туругура туруохтун!» — диэн этэрэ. ¹⁴Түөрт харамай эмиэ «Аминь!» дэспитэ, сүүрбэ ордугуна түөрт ытык кырдыаҕас сөһүргэстии түһэн үйэлэр тухары Тыыннаахха сүгүрүйбүтэ.

* 5:8 *Сибэтиэйдэр* — Танара дыноно.

** 5:9 *Биһигини* — сорох былыргы гректии илиинэн суруйууга бу тыл суох.

*** 5:10 *Биһигини* — сорох былыргы гректии илиинэн суруйууга «кинилэри».

Биһиги сир үрдүгэр ыраахтаабылыахпыт — «кинилэр сир үрдүгэр ыраахтаабылыахтара».

Алта бэчээт

6 Онтон көрбүтүм Агнец сэттэ бэчээттэн бастакытын төлөрүтэн ылбыта, онуоха түөрт харамайтан биирдэстэрэ сүллэрэтин куолаһынан: «Кэлэнгин көр!»* — диир саната иһиллибитэ. ² Көрбүтүм — арай үүт манган ат кэлэн турара; ону миинэн олорооччу ох саалааҕа, киниэхэ төбөтүгэр мэнньиэс кэтэргиттэрэ, онон кини кыайыылаах-хотуулаах сиэринэн өссө да кыайарды-хотордуу тахсан барбыта.

³ Онтон иккис бэчээти төлөрүппүтүгэр иккис харамай: «Кэлэнгин көр!» — диэн ынгыраар санатын истибитим. ⁴ Онуоха кугас ат тахсан кэлбитэ; ол аты миинэн олорооччуга сиртэн эйэни мэлитэн ылар, дьону-сэргэни бэйэ-бэйэлэрин сэймэктэһиннэрэр көңүл бэриллбитэ, илиитигэр сүүнэ улахан саабылаан батас туттарыллыбыта.

⁵ Онтон үһүс бэчээти төлөрүппүтүгэр үһүс харамай: «Кэлэнгин көр!» — диир санатын истибитим. Көрбүтүм — арай хара ат турара; ол аты миинэн олорооччу илиитигэр ыйааһын биэтэһини сылдыра. ⁶ Иһиттэһпинэ, түөрт харамай быһыһыттан: «Биир динарийга — мээрэй эрэ сэлиэһинэй, биир динарийга — үс мээрэй эрэ дьэһимиэн. Олива арытын уонна виноград арыгытын көбүрэтимэн», — диир сана иһиллибитэ.

⁷ Онтон төрдүс бэчээти төлөрүппүтүгэр төрдүс харамай: «Кэлэнгин көр!» — диир санатын истибитим. ⁸ Көрбүтүм — арай күөх буурул ат турара, аты миинэн олорооччу аата «Өлөр Өлүү» диэн этэ, кинини аад батыһан иһэрэ; киниэхэ сир үрдүн түөрт гыммыттан биирин батаһынан кырган, суту сатыылатан, өлүүлээх сутулу туруоран, сир үрдүгэр баар адырҕа кыылынан кыдыйтаран имири эһэр кыах бэриллбитэ.

⁹ Онтон бэһис бэчээти төлөрүппүтүгэр сиэртибэнньик анныгар баар дьон дууһаларын көрбүтүм. Ол — Таһара тылын биллэрбиттэрин, туоһулаабыттарын иһин, өлөрүллүбүт дьон дууһалара этэ. ¹⁰ Кинилэр: «Оо, Сибэтиэй, Кырдыктаах Улуу Баһылык, хаһаанна диэри бу сир үрдүгэр олорооччулары дьүүллээбэккин, биһиги хааммытын иэстэспэккин?» — диэн үөгүлэхэр саналара

* 6:1, 3, 5, ⁷ *Кэлэнгин көр!* — сорох былыргы гректии илиинэн суруйууга «Кэл!»

иһилилибитэ. ¹¹ Онуоха хас биирдиилэригэр манан таҥаһы биэр-
биттэрэ, итиэннэ бииргэ үлэлээбит дьонноро, биир итэҕэллээх
бырааттара эмиэ өлөрүллэн, кинилэр ахсааннарын ситэриэхтэ-
ригэр диэри, кыратык кэтэһэ түһэллэригэр эппиттэрэ.

¹² Онтон алтыс бэчээти төлөрүппүтүгэр көрбүтүм, арай сүдү
күүстээх сир хамсааһына буолбута, күн өлөн кутурҕан таҥа-
һын курдук хараара өспүтэ, толору ый хаан курдук кытарбыта;
¹³ күүстээх тыал илигирэттэбинэ, ситэ буспатах смоковница
отоно сиргэ тохторун курдук, халлаан сулустара сиргэ суоллу-
буттара. ¹⁴ Халлаан түрбэ курдук түүрүллэ түһээт, сүтэн хаал-
быта, хас хайа, хас арыы барыта турар сириттэн халбарыйбыта.
¹⁵ Сир ыраахтааҕылары, үрдүк сололоохтор, баайдар, сэрии то-
йотторо, кыахтаахтар-күүстээхтэр итиэннэ кулут да, көңүл да
дьон — бары хайа хаспахтарыгар, хапчааннарыгар хорҕойон ба-
ран, ¹⁶ хайаларга, сымара таастарга туһаайан: «Биһиги үрдүбү-
түгэр сууллун, биһигини бүрүстүөлгэ Олорооччу хараҕыттан,
Агнец уоруттан саһыарын! — диэн үөгүлэспиттэрэ. — ¹⁷ Кини
урдайар улуу күнэ тирээн кэллэ; оо, ким ону тулуйуо баарай?»

Израиль 144 000 киһитэ

7 Бу кэнниттэн көрбүтүм — сир түөрт муннугар түөрт Аан-
һал, сиргэ да, муораҕа да, хайа да маска тыалырбатын
диэн, сир түөрт тыалын тутан тураллара. ² Онтон тус илин диэ-
киттэн, күн тахсар сириттэн, атын Аанһал Тыыннаах Таҥара
бэчээтин туппутунан, өрө дабайан иһэрин көрбүтүм. Кини
сири, муораны буортулуур кыах бэриллибит түөрт Аанһалыгар
туһаайан дорҕоонноох куолаһынан: ³ «Таҥарабыт кулуттарын
сүүстэригэр бэчээт ууруохпутугар диэри, сиргэ да, муораҕа да,
маска да буортуну оноруман», — диэн сангаран дуораһыппыта.
⁴ Онтон иһиттэхпинэ, бэчээт бэлиэлээхтэр ахсааннара Израиль
бары аҕатын ууһуттан сүүс түөрт уон түөрт тыһыынча киһи
буолбута:

⁵ Иуда аҕатын ууһуттан уон икки тыһыынча киһи,
Рувим аҕатын ууһуттан уон икки тыһыынча,
Гад аҕатын ууһуттан эмиэ уон икки тыһыынча киһи,

⁶ Асир аҕатын ууһуттан уон икки тыһыынча,
Неффалим аҕатын ууһуттан уон икки тыһыынча,
Манассия аҕатын ууһуттан уон икки тыһыынча,

⁷ Симеон аҕатын ууһуттан уон икки тыһыынча,
 Левий аҕатын ууһуттан уон икки тыһыынча,
 Иссахар аҕатын ууһуттан уон икки тыһыынча,
⁸ Завулон аҕатын ууһуттан уон икки тыһыынча,
 Иосиф аҕатын ууһуттан уон икки тыһыынча,
 Вениамин аҕатын ууһуттан уон икки тыһыынча киһи бэчээт-
 тэммитэ.

Норуот аайыттан үтүмэн үгүс киһи

⁹ Онтон көрбүтүм, арай ким да ситэн аахпат үтүмэн үгүс киһи-тэ хас биирдии омуктан, биис уустан, норуоттан, тылтан кэлэн бүрүстүөл уонна Агнец иннигэр манган таҥаһы таннан, пальма лабааларын тутан тураллара. ¹⁰ Кинилэр: «Бүрүстүөлгэ олоһор Танарабыт уонна Агнец биһигини быһаатылар!» — диір дуорааннаах саналара ньиргийэн иһиллэрэ. ¹¹ Аанһаллар бары бүрүстүөлү, ытык кырдыаҕастары уонна түөрт харамайы тула-лаан тураллара, бүрүстүөл иннигэр сөһүргэстээн туран, Танараҕа бокулуон уураллара. ¹² «Аминь! Дьин чаччы биһиги Танарабыт үйэттэн үйэҕэ алгыстаах, албан ааттаах, муударай. Киниэхэ махтал уонна чиэс буолуохтун, Кини былааһа, модун кыаҕа үйэттэн үйэҕэ туругура туруохтун! Аминь!» — диір саналара энсиллэн иһиллэрэ.

¹³ Онтон кырдыаҕастартан биір дэстэрэ миигиттэн: «Бу манган таҥастаах дьон кимнээҕий, хантан кэлбиттэрэй?» — диэн ыйыппыта. ¹⁴ Мин киниэхэ: «Тойонуом, эн билэҕин», — диэн хоруйдаабытым. Онуоха эппитэ: «Бу улуу кутурҕантан кэлбит дьон, кинилэр таҥастарын Агнец Хааныгар сууйан туртаппытара. ¹⁵ Ол иһин кинилэр билигин Танара бүрүстүөлүн иннигэр сылдыбаллар, түүннэри-күнүстэри Киниэхэ Дьэтин иһигэр сулууспалыылар; бүрүстүөлгэ Олорооччу кинилэргэ Бэйэтинэн халын хахха, суон дурда буолуоҕа. ¹⁶ Аччыктыыр-утатар диэни аны хаһан да билиэхтэрэ суоҕа, күн уота кинилэри охсуо суоҕа, сыралҕан куйаас сырайыа суоҕа; ¹⁷ бүрүстүөл ортотугар баар Агнец кинилэргэ Маныһыт буолан, өлбөт мэнгэ уутун дьүүктэтигэр сирдээн илдьиэҕэ. Танара кинилэр харахтарын уутун хас биірдии таммаҕын сотуоҕа».

*Сэттис бэчээт
уонна кыһыл көмүс хадьыыла*

8 Агнец сэттис бэчээти төлөрүппүтүгэр халлаан чаас аңаарын кэрингэ им-дьим буола иһийэн хаалбыта. ²Онтон көрдөхпүнэ, Танара иннигэр турааччы сэттэ Аанньалга сэттэ үрэр турбаны туттарбыттара. ³Аны биир атын Аанньал кэлэн, кыһыл көмүс хадьыыланы туппутунан сиэртибэннык иннигэр турбута; бары сибэтийдэр мэлиппэлэрин кытта холбуу бүрүстүөл иннинээҕи кыһыл көмүс сиэртибэнныккэ уурдун диэн киниэхэ элбэх фимиамы биэрбиттэрэ. ⁴Фимиам буруота сибэтийдэр мэлиппэлэрин кытта бииргэ Аанньал илиититтэн үөһэ диэки Танара иннигэр унаарыйа устан тахсыбыта. ⁵Аанньал хадьылатын сиэртибэнныктэн ылбыт уотунан толорон баран, сиргэ таннары сүөкээбитэ — сонно тута сиргэ сана-ингэ ньамаласпытта, этин этэн ньириһиппитэ, чаҕылҕан чаҕылыыбыта, сир хамсааһына буолбута.

Маннайгы түөрт турба

⁶Онтон сэттэ турбалаах сэттэ Аанньал турбаларын үрэргэ бөлөмнөммиттэрэ.

⁷Бастакы Аанньал турбатын үрбүтүгэр хаан булкаастаах уоттаах тобурах сиргэ түһэн, мас үс гыммыт биирэ хара хоруонан көрбүтэ, үүнэн турбут күөх от бүтүннүү умайбыта.

⁸Иккис Аанньал турбатын үрбүтүгэр сүдү улахан хайа курдук туох эрэ умайан күүдэпчилэммитинэн муораҕа суулан, муора үс гыммыт биирэ хаанга кубулуйбута, ⁹муораҕа олохтоох харамай үс гыммыт биирэ өлбүтэ, уста сылдыбыт хараабыллар үс гыммыт биирдэрэ тимирбитэ.

¹⁰Үһүс Аанньал турбатын үрбүтүгэр халлаантан сүүнэ улахан сындыыс сулус, умайа сылдыар факел курдук, өрүстэр үс гыммыт биирдэригэр уонна сир тымырыгар түспүтэ. ¹¹Бу сулус аата Сытыган Эрбэһин диэн; уу үс гыммыт биирэ аһыйан, ону иһэн элбэх киһи өлбүтэ.

¹²Төрдүс Аанньал турбатын үрбүтүгэр күн үс гыммыт биирэ, ый үс гыммыт биирэ, сулустар үс гыммыт биирдэрэ эмсэҕэлээн, үс гыммыт биирдэрэ хараара өлбүтэ; үһүн күн үс гыммыт биирин тухары сырдык суох буолбута, түүн эмиэ биир оннуга.

¹³ Онтон көрдөхпүнэ, халлаан хабайар хаба ортотунан биир Аанньал* көтөн иһэн: «Субу турбатын үрүөхтээх үс атын Аанньал турбата тыаһаатабына, сир үрдүгэр олорооччуларга сор-мунг, сор-мунг, сор-мунг буолуо!» — диэн сангаран сатарыппыта.

Бэһис турба

9 Бэһис Аанньал турбатын үрбүтүгэр көрбүтүм, арай халлаантан сиргэ сулус түспүтэ, бу сулуска түгэҕэ биллибэт диринг анхай айабын аһар күлүүс тыла бэриллибитэ. ² Кини анхай айабын аспытыгар ол иһиттэн, сүүнэ оһохтон тахсар курдук, өһөх буруо өрө оргуйбута; күн будулуйа өһөн, салгын ыыс-быдаан буруо буолан хаалбыта. ³ Күдэрик быһыһыттан сиргэ саранча үөрэ өрө анһан тахсыбыта; бу саранчаҕа сир үрдүгэр баар сүлүһүннээх ооҕуй курдук киһини тигэр кыах бэриллибитэ. ⁴ Сир үрдүгэр үүнэн турар хайа да оту, үүнээйини, ханнык да маһы буортулаама, арай сүүһүгэр Танара бэчээтэ суох дьону эрэ эмсэҕэлэт диэн саранчаҕа этиллибитэ. ⁵ Онон дьону өлөрбөккө эрэ, биэс ый устата сордуур-муннуур кыах киниэхэ бэриллибитэ; оннук сордоотобуна, киһи, сүлүһүннээх ооҕуй тиктэҕинэ, эрэйдэнэрин курдук, эрэйдэнэрэ. ⁶ Ол күннэргэ дьон өлөр өлүүнү көрдүөхтэрэ да, кыайан булуохтара суоҕа, өлүөхтэрин баҕарыахтара да, өлөр өлүү кинилэртэн куота көтөн биэриэҕэ.

⁷ Көстөр көрүнгүнэн саранча кыргыһыга киирээри бэлэм турар сылгы курдуга; баһыгар кыһыл көмүскэ маарынныыр хо-руналаахха дылыта, киһи сирэйин курдук сирэйдээҕэ, ⁸ дыахтар баттабын курдук баттахтааҕа, тииһэ хахай тииһин курдуга. ⁹ Тимир куйабы санатар түөс куйахтааҕа, кынатын тыаһа сэриигэ көтүтэн иһэр үтүмэн үгүс аттар холбоммут колесницаларын тыаһын курдук тип-тилигирэс этэ; ¹⁰ сүлүһүннээх ооҕуй курдук кутуруктааҕа, кутуругун уһугар иннэлээҕэ; ол иннэтинэн дьону тигэн биэс ыйы быһа эмсэҕэлэтэр күүстээҕэ. ¹¹ Бу саранча түгэҕэ биллибэт анхай аанньала баһылыктааҕа; ол аанньал аата еврейдии — Аваддон, оттон гректии — Аполлион**.

¹² Биир иэдээн ити курдук кэлэн ааспыта; көр бу, тилэх баттаһа өссө икки атын иэдээн иһэрэ.

* 8:13 *Аанньал* — сорох былыргы гректии илиинэн суруйууга «хотой».

** 9:11 *Аваддон* — «аллараа дойдуга баһылыга». *Аполлион* — «өлөрүөхсүт».

Алтыс турба

¹³Алтыс Аанньал турбатын үрбүтүгэр Тангара иннигэр турар кыһыл көмүс сиртибэнньик түөрт муннугуттан саҥа иһиллибитэ. ¹⁴Ол истибит саҥам турбалаах алтыс Аанньалга туһаайан: «Улуу Ефрат өрүскэ кэлгиллэн сытар түөрт Аанньалы босхо-лоо», — диэбитэ. ¹⁵Онон болдьохтоох сылларын ыйаахтаах ыйыгар, күүтүллүбүт күнүгэр, анаммыт чааһыгар киһи аймах үс гыммыт биирин имири эһэргэ бэлэм сытыарыллыбыт түөрт Аанньал босхоломмота. ¹⁶Аттаах сэриит ахсаана икки сүүс мөлүйүөн этэ. Бу ахсааны истэрбэр ааттаабыттара. ¹⁷Ити көрөр көрүүбэр ынчырдаах аттаахтар бааллара, кинилэр умайар уот кыһыл өгүнэн, сапфир курдук күөх, сирэ курдук араҕас өгүнэн оонньуу сылдьар түөс куйахтаахтара; аттара хахайга маарынныыр төбөлөөхтөрө, аяхтарыттан уот уһуурара, буруо, сирэ бургу-чуйара. ¹⁸Ити үс иэдээнтэн — аттар аяхтарыттан уһуурар уоттан, буруоттан, сирэттэн киһи аймах үс гыммыт биирэ өлбүтэ. ¹⁹Аттар күүстэрэ аяхтарыгар уонна кутуруктарыгар түмүллэн сылдьара; кутуруктара эриэн үөнү санаталлара; ол кутуруктар хончонноһо сылдьар төбөлөрүнэн дыону кэйгэллииллэрэ.

²⁰Оттон ити иэдээнтэн өлбөтөх дыон аһыһыларын билинэн кэмсиммэтэхтэрэ, абааһыга уонна көрөр хараҕа, истэр кулгааҕа, хаамар атаҕа суох кыһыл да, үрүн да көмүс, алтан, таас уонна мас эмэгэскэ сүгүрүйэллэрин уураппатахтара; ²¹дыону өлөрөллөрүн, абынан-хомуһунан дыарыгыралларын, содурдук быһыланалларын, уоралларын тохтоппотохторо.

Арыллыбыт кинигэлээх Аанньал

10 Онтон күүстээх атын Аанньал былыкка суулланан, халлаантан түһэн иһэрин көрбүтүм; төбөтүн иилии кустук оонньуура, сирэйэ күн курдук күлүмүрдүүрө, икки атаҕа икки уот баҕана курдуга; ²илиитигэр арыллыбыт кыра кинигэни тутта сылдьара. Аанньал уҥа атаҕынан муораҕа, хаҥаһынан сиргэ үктэнэ түһэн баран, ³хахай хаһытыырын курдук, күүстээх куолаһынан сангаран сатарыппыта; ол сангарбытыгар хардаран, халлаанна сэттэ сүллэр этин эппитэ. ⁴Сэттэ этин эппитигэр мин сурунарды оҥостон иһэн, халлаантан: «Сэттэ этин тугу эппитин суруйума, кистэлэннэ тут», — диир саҕаны истибитим.

⁵Муораҕа да, сиргэ да үктэнэн турарын көрбүт Аанньалым унга илиитин халлаанга өрө уунан туран ⁶үйэттэн үйэлэр тухары Тыыннаабынан, халлааны уонна онно баары барытын, сири итиэннэ сиргэ баары барытын, муораны, муора түгэҕэр баары барытын Айбытынан андаҕайбыта. «Бириэмэ манан бүтэр, — диэбитэ кини. — ⁷Ол гынан баран сэттис Аанньал турбатын үрэр күнүгэр Танара кистэлэнг сорууга, Кини Бэйэтин пророк кулуттарыгар хайдах биллэрбитэй да, ол курдук туолуоҕа».

⁸Халлаантан истибит санам эмиэ миэхэ туһулаан: «Муораҕа уонна сиргэ үктэнэн турар Аанньалга баран, арыллыбыт кинигэни илиититтэн ыл», — диэбитэ. ⁹Мин Аанньалга тийэн: «Кинигэни миэхэ аҕал», — диэн көрдөспүтүм. Онуоха Кини: «Мэ, ылан сиэн кэбис. Куртаххар аһы буолуо гынан баран, айаххар мүөт курдук миннийэн кириэбэ», — диэбитэ. ¹⁰Аанньал илиититтэн кинигэни ылан сиэбитим айахпар мүөт курдук миннийэн кирибитэ эээри, ыйыстыбыппар куртахпын курулта аһыппыта. ¹¹Кини миэхэ: «Үгүс норуот, омук, тыл, ыраахтааҕы туһунан Танара тугу этэрин дьонго өссө төгүл иһитиннэриэх тустааххын», — диэн эппитэ.

Танара икки кэрэһитэ

11 Онтон сири мээрэйдиир ураҕаска маарынныыр торуосканы илиибэр туттаран баран, эппиттэрэ: «Баран Танара Дьэтин уонна сиэртибэнныги мээрэйдээ, итиэннэ Дьэ иһигэр баар сүгүрүйээччи дьон ахсаанын аах; ²арай тас тиэргэнин мээрэйдээмэ, хааллар; тас тиэргэн атын омуктарга бэриллэн турар: кинилэр ытык куораты түөрт уон икки ый устата илдьи тэп-сиэхтэрэ.

³Мин бар дьонго этэр тылбын тиэрдэр күүһү икки кэрэһит киһибэр биэриэҕим. Оччоҕо кинилэр кутурҕан таҕаһын таннан, Мин этэрбин тыһыынча икки сүүс алта уон күн устата иһитиннэриэхтэрэ». ⁴Бу икки киһи сир Танаратын иннигэр турар икки олива мас уонна икки сырдатар сибэтииннык буолар. ⁵Кинилэри ким эмэ атаҕастыан баҕардаҕына, икки кэрэһит айаҕыттан уот уһууран тахсан өстөөхтөрүн түрүтэ сиэбэ; кинилэри атаҕастыырга санаммыт киһи ити курдук өлөрүллүөбэ. ⁶Кинилэр Танара этэрин биллэрэр кэммитигэр сиргэ ардах түспэтин диэн, халлааны хам хатыыр, ууну хаанга кубулутар уонна хаһан

баҕардылар да, сир үрдүгэр араас алдьархайы ааннатар былаастаахтар.

⁷Кэрэһиттээн бүтүктэринэ, түгэҕэ биллибэт анхайтан адьырҕа кыыл тахсан кинилэри кытта охсуһан, хотон иккиэннэрин өлөртүөҕэ уонна ⁸өлүктэрин Айыы Тойоммут кириэскэ тириллибит улуу куоратын уулуссатыгар хаалларыаҕа. Бу куорат аата — ханалытан этэр буоллаха, Содом уонна Египет. ⁹Араас норуоттан, уустан, тылтан, омуктан үгүс киһи, үс түүннээх күн уонна күн аңаарын устата кинилэр өлүктэрин көрүөҕэ уонна өлүктэри хоруопка сытыарары көнүллүө суоҕа. ¹⁰Бу икки пророк сир олохтоохторун эрэйдээбит буолан, сир дьоно кинилэр өллөхтөрүнэ, үөрүү-көтүү бөҕө буолуохтара, бэйэ-бэйэлэригэр бэлэх ытыһыахтара.

¹¹Ол гынан баран үс түүннээх күн ордуга күн аңаара ааспытын кэннэ, Танара кинилэргэ олох тыһынын киллэрэн, бу икки киһи сүһүөҕэр туран кэлбитэ; кинилэри көрбүт дьон уолуйа куттаммыттара. ¹²Онтон икки кэрэһит халлаантан: «Манна тахсын», — диир сана дуораһыйарын истибиттэрэ. Иккиэн, өстөөхтөрө көрөн турдактарына, былыкка куустаран үөһэ халлаанна тахсыбыттара.

¹³Сонно тутта улуу сир хамсааһына буолан, куорат уон гыммыт биирэ урусхалламмыта; бу сир хамсааһыныгар сэттэ тыһыынча киһи өлбүтэ, онтон ордубута кутталыттан Халлаанна баар Танараҕа уруй-айхал эппитэ.

¹⁴Иккис иэдээн ити курдук ааспыта эрэри, өр-өтөр буолбатаҕа, аны үһүс иэдээн иһэрэ.

Сэттис турба

¹⁵Онтон сэттис Аанһал турбатын үрбүтүгэр халлаанна: «Аан дойду саарыстыбата аны Айыы Тойоммут уонна Кини Христун Саарыстыбата буолла. Айыы Тойон үйэттэн үйэлэр тухары ыраахтааҕылыаҕа!» — диир сана сатараабыта.

¹⁶Танара иннигэр турар бүрүстүөллэргэ олорор сүүрбэ түөрт ытык кырдыаҕас сөһүргэстии түһэн Танараҕа сүгүрүйбүттэрэ. «¹⁷Билигин да баар, урут да баар, кэлиэхтээх Айыы Тойон Танара, Барытын Тутан Олорооччу, Эн сүдү күүскүн көрдөрөн-нүн, ыраахтааҕы буолбуккар Эйиэхэ махтанабыт! ¹⁸Норуоттар суоһурҕанналар эрэри, Эн уордайар кэмин үүннэ, өлбүттэри

дьүүллүүр күнүн, кулуттаргар, пророктаргар, сибэтиэйдэргэр, Эн ааккын ытыктааччыларга — кыраҕа да, улууга да иэстэрин төлүүр, сир үрдүн имири эһээччилэри бэйэлэрин имири эһэр кэммин тийээн кэллэ!»

¹⁹Халлаанна Танара Дьиэтин аана тэлэччи аһыллыбыта, ол иһигэр Танара кэс тылын хоппото көстүбүтэ; чаҕылҕан чаҕылыһыбыта, этинг этэн ньириһиппитэ, санга-ингэ, тыас-уус иһилибитэ, сир хамсаабыта, улуу тобурах тоҕо түспүтэ.

Дьахтар уонна садаҕа моҕой

12 Онтон халлаанна сүдү бэлиэ көстүбүтэ: күнү таҕастыы сөрөммүт дьахтар ыйга үктэнэн турара, төбөтүгэр уон икки сулустаах мэнньиэстээҕэ; ²Дьахтар оһоҕостооҕо, талыыта киирэн ыарыыланан ыһыгытыра. ³Халлаанна аны атын дыкти бэлиэ — сэттэ төбөлөөх, уон муостаах, төбөтүн аайы кыракый хоруоналаах, уот кыһыл* өҥнөөх сүүнэ улахан садаҕа моҕой — көстүбүтэ. ⁴Моҕой халлаан сулуһун үс гыммыт биирин кутуругунан тоҕо сөрөөн ылан, сир диэки илгэн кэбиспитэ. Онтон кэмэ кэлбит дьахтар иннигэр, оҕолонноҕуна оҕотун мэниэстэн кэбиһээри, кэтэһэн турбута. ⁵Дьахтар бары норуоту тимир то-руосканан салайыахтаах уол оҕону төрөтөөтүн, оҕото сонно тутта Танараҕа, Танара бүрүстүөлүгэр үөһэ ылыллыбыта. ⁶Оттон бэйэтэ иччитэх бүөм сиргэ — тыһыынча икки сүүс алта уон күн устата көрүүгэ-харайыыга сырыттын диэн Танара киниэхэ анаан бэлэмнэттэрбит сиригэр — куоппута.

⁷Онтон халлаанна сэрии буолбута: Михаил уонна кини Аанһаллара садаҕа моҕойу утары охсуспуттара. Садаҕа моҕой аанһалларыныын эмиэ кинилэри кытта киирсибиттэрэ, ⁸ол гынан баран, өр тулуспатахтара, уонна халлаанна кинилэргэ аны сылдыар сир ордубатаҕа даҕаны. ⁹Онон сири-халлааны бүтүннүү албынныы сылдыбыт улуу моҕой, атыннык адьарай уонна сатана диэн ааттаах былыргы эриэн кыыл, сиргэ таннары сатыылаабыта, аанһаллара эмиэ кинини кытта бииргэ аллара кыйдамыттара. ¹⁰Онтон халлаанна ньиргиздээх санга иһилибитэ: «Быһһаны кэмэ кэллэ, Танарабыт күүһүн-күдэбин

* 12:3 *Уот кыһыл* — сорох былыргы гректии илиинэн суруйууга «уот тыннаах».

көрдөрөн баһылыыр кэмэ үүннэ, Танара Христона былааһы ылла: бырааттарбытын түүннэри-күннэри Танарабыт иннигэр буруйдааччы аллара кыйданна! ¹¹ Бырааттарбыт кинини Агнец Хаанынан, туоһулуур тылларынан кыайбыттара; кинилэр, хара өлүөхтэригэр да диэри, олохторун таптаабатахтара. ¹² Онон, мэһэ Халлаан, өрөгөйдөө, Халлаанна олохтоох эрэ барыта, үөркөт! Сор-мун буолуо эһиэхэ, сиргэ, муораба олорооччуларга! Адьарай, өр уһабатын билэн, эһиэхэ кинэ-наара холлон түстэ».

¹³ Сиргэ эһилибиппин диэн өйдөөт, моҕой аны уол оҕону төрөппүт дыахтары сойуолаһан барбыта. ¹⁴ Дьахтар эриэн кыылан куотан иччитэх бүөм сиргэ, тийиэхтээх сиригэр көтөн тийэрин туһугар, киниэхэ хотой икки модун кыната бэриллибитэ. Онно тийдэбинэ, кинини үс аҥаар сыл устата көрөн-харайан олордуохтаахтара. ¹⁵ Сүүрүккэ оҕустардын диэн, эриэн кыыл аны айабыттан өрүстүү суккуллар ууну дьахтар диэки ыппыта. ¹⁶ Ол гынан баран сир дьахтарга көмөлөһөөрү, силлэн, моҕой айабыттан сүүрэр ууну ингэринэн кэбиспитэ. ¹⁷ Дьахтарга суоһуран, садаба моҕой аны кини атын ыччатын, Танара кэриэстэрин тутуһар, Иисус Христос туоһулаабыт кырдыгар бэриһиилээх дьону кытта кыргыһа барбыта.

Икки кыыл

13 Мин муора кумах кытылыгар турбутум*. Ол туран көрдөхпүнэ, арай муораттан сэттэ бастаах, уон муостаах кыыл тахсан иһэрэ: муоһун аайы биирдии кыра хоруоналааба, баһын аайы Танараны холунналар ааттааба. ² Бу көрбүт кыылым леопард курдук көрүнгээх, эһэ курдук атахтаах, хайдыы айахтаах этэ; садаба моҕой киниэхэ бэйэтин күүһүн, бүрүстүөлүн, улуу былааһын биэрбитэ. ³ Көрдөхпүнэ, кыыл биир баһа өлөрдүү бааһырбыт курдук этэ да, ол бааһа мүлүрүччү оспута; онон сир үрдэ бүтүннүүтэ сөҕөн-махтайан кыылы батыспыта уонна киниэхэ былаас биэрбит садаба моҕойго сүгүрүйбүтэ. ⁴ Кинилэр: «Кыылга холоонноох ким баарый, ким кинилиин күөн көрсөр кыахтааҕый?» — дии-дии кыылга эмиэ сүгүрүйбүттэрэ.

* 13:1 *Мин муора кумах кытылыгар турбутум* — сорох былыргы гректии илиинэн суруйууга «садаба моҕой муора кытылыгар турбута».

⁵ Кыыл Тангараны холуннаран улуутумсуйан сангарара көнгүл-лэммитэ, киниэхэ түөрт уон икки ый устата дьайар былаас бэриллитэ. ⁶ Онон кини Тангара аатын, Тангара олорор эйгэтин итиэннэ Халлаанга олохтоохтору баһаабырдар санааттан Тангараны холуннаран киирэн барбыта. ⁷ Киниэхэ сибэтиэйдэри кытта сэриилэһэн кыайар көнгүл уонна хас биирдии биис ууһун, норуоту, тылы, омугу барытын баһылыыр былаас бэриллитэ. ⁸ Сир дьоно барыта, аан дойду айыллыан инниттэн толук буоларга анаммыт Агнецка баар Олох Кинигэтигэр аата-суола киирбэтэх хас биирдии киһи — бу кыылга сүгүрүйүөҕэ.

⁹ Ким истэр кулгаахтаах иһиттэҕэ буолуохтун: ¹⁰ ким билиэн ылар — бэйэтэ билиэн барыаҕа, ким болотунан өлөрөр — бэйэтэ болоттон өлүөҕэ*. Бу — сибэтиэйдэри улуу тулуурга, итэҕэлгэ ынгырыы.

¹¹ Онтон аны атын кыыл сиртэн тахсан эрэрин көрбүтүм. Ол кыыл бараан курдук икки муостааҕа, садаҕа моҕойдуу сангарара, ¹² бастакы кыылы кытта бииргэ сылдьан, кини былааһын толору туһанара уонна сири, сир олохтоохторун барыларын өлөр бааһа оһо охсон хаалбыт кыылга сүгүрүйэллэригэр күһэйэрэ. ¹³ Кини улуу дыкти бэлиэлэри көрдөртүүрэ — дьон көрөн турдагына, оннооҕор халлаантан сиргэ уоту түһэрэрэ. ¹⁴ Бастакы кыылы кытта бииргэ сылдьан онгоро көнгүллэммит дыктилэринэн кини сир олохтоохторун албынныыра уонна батас-тан бааһыран баран тыыннаах ордубут кыыл мөссүөнүн үтүгүннэрэн ылын диэн дьону күһэйэрэ; ¹⁵ кыыл мөссүөнүгэр тыын киллэрэр кыах киниэхэ бэриллэн, кыыл мөссүөнэ сангарар-ингэрэр, киниэхэ сүгүрүйбэтэхтэри өлөртөрөр гына дьаһайар кыах-таммыта. ¹⁶ Бу иккис кыыл барыларыгар — кыраҕа да, улууга да, баайга да, дьаданыга да, көнгүлгэ да, кулукка да — уна илиилэригэр эбэтэр сүүстэригэр бэлиэ уурдарыаҕа, ¹⁷ оччоҕо бэлиэлээх-тэртэн, атыннык эттэххэ, кыыл аата эбэтэр кини аатын чыыһылата суруллубут киһиттэн ураты ким да атыылаһар да, атыылыыр да кыаҕа суох буолуоҕа.

* 13:10 *Ким билиэн ылар — бэйэтэ билиэн барыаҕа, ким болотунан өлөрөр — бэйэтэ болоттон өлүөҕэ* — сорох былыргы гректии илиинэн суруйууга «Ким билиэн барыахтаах — билиэн барыаҕа, ким болоттон өлүөхтээх — болоттон өлүөҕэ».

¹⁸ Бу маны өйдүүргэ муударай өй ирдэнэр. Ким муударай өйдөөх, ол кыыл чыыһылатын ааһан быһаардын, ол эбэтэр бу — киһи чыыһылата; бу чыыһыла — алта сүүс алта уон алта.

144 000 киһи ырыата

14 Көрбүтүм, арай Сион хайатын үрдүгэр Агнец турара, атыгар сүүс түөрт уон түөрт тыһыынча киһи — сүүстэригэр Кини Аһатын аата суруллубут дьоно — турара. ² Онтон халлаантан дохсун уу күрүлээн эрэригэр дуу, күүстээх этинг этэн ньириһитэригэр дуу холоонноох сананы истибитим. Ол истибит санам арфаа оонньооччулар таһаарар дорҕооннорун санатара. ³ Кинилэр бүрүстүөл, түөрт харамай уонна ытык кырдыаҕастар иннилэригэр туран эрэ санга ырыаны ылыыллара; сиртэн толуйуллан ылыллыбыт сүүс түөрт уон тыһыынча киһиттэн ураты ким да бу ырыаа үөрэнэр кыага суоҕа. ⁴ Бу — дьахтарга чугаһаабатах, ыраастарын сүтэрбэтэх уолунан сылдыар дьон; бу — Агнец хайа диэки барар да, ону батыһааччылар. Таһараа уонна Агнецка анаммыт бастын үүнүү буолалларын быһыытынан, Таһара кинилэри киһи аймахтан толуйан ылбыта. ⁵ Бу — этэр тылларыгар сымыйаны сыһарбатах, Таһара бүрүстүөлүн иннигэр энкилэ суох ыраас дьон.

Үс Аанһал Дьүүл Күнэ ууммутун биллэрэр

⁶ Онтон халлаан үөһүнэн атын Аанһал сир үрдүгэр олорооччуларга — хас биирдии омукка, биис ууска, тылга, норуокка — үйэттэн үйэлэр тухары өлбөөдүйбэт Евангелиены ильдэ көтөн иһэрин көрбүтүм. ⁷ Аанһал: «Таһараттан толлунг-торуттунг, Кинини уруйдаан-айхаллаан! Кини аан дойду дьонун дьүүлүүр кэмэ кэллэ! Сири-халлааны, муораны, сир тымырын барытын Айбыкка сүгүрүйүн!» — диир күүстээх саната энсиллэн иһиллэрэ.

⁸ Атын Аанһал кинини батыһан иһэн: «Содур олоҕун уохтаах арыгытынан бары омукка айах туппут улуу куорат Вавилон суулунна, суулунна!» — диэн санара иһэрэ.

⁹ Онтон кэннилэриттэн иһэр үһүс Аанһал саната дуораһыйбыта: «Ким кыылга уонна кыыл мөссүөнүгэр сүгүрүйбүт, кини бэлиэтин сүүһүгэр дуу, илиитигэр дуу туруортарбыт, ¹⁰ ол — Таһара уор-кылын иһитигэр убаппакка эрэ куппут уохтаах утаҕын иһиэҕэ, уонна сибэтиэй Аанһаллар итиэннэ Агнец көрөн

турдахтарына, уоттаах сиэрэбэ умайан сору-муну көрүөбэ; ¹¹ кинилэр сордонор күдэн буруолара үйэттэн үйэлэргэ өрө уста туруоҕа; кыылга уонна кини мөссүөнүгэр сүгүрүйээччилэр, кыыл аатын бэлиэтин ылынааччылар күнүһүн да, түүнүн да уоскулан диэни билиэхтэрэ суоҕа».

¹² Бу — Танара кэриэстэрин толорор, Иисуска бэриниилээх сибэтийдэри улуу тулуурдаах буолууга ынтырыы.

¹³ Онтон мин халлаантан: «Суруй: „Мантан инньэ Айыы Тойонно бэриниилээх өлөр киһи алгыстанар!“» — диир сананы истибитим.

«Дын чахчы, — диир Тыын, — кинилэр үлэлэриттэн сынньаныахтара, оттон онгорбут үтүөлэрэ кэннилэриттэн батыһан барыаҕа».

Сиргэ хомуур кэмэ

¹⁴ Көрбүтүм, арай сырдык былыт көстүбүтэ, былыкка Киһи Уолугар майгыннаах Ким эрэ олороро; төбөтүгэр кыһыл көмүс мэнньиэстээбэ, илиитигэр сытыы сиэргэлээбэ. ¹⁵ Онтон атын Аанньал Танара Дьэтиттэн тахсан кэлэн, былыкка Олорооччуга туһаайан: «Сиэргэбин ылангын быспытынан бар, хомуур кэмэ кэллэ, сир үүнүүтэ ситтэ», — диэн санаран дуораһыппыта. ¹⁶ Былыкка Олорооччу сиэргэтин сир диэки далайатын кытта, сирдээби хомуур хомуллан бүппүтэ.

¹⁷ Аны атын Аанньал халлаанга баар Танара Дьэтиттэн илиитигэр сытыы сиэргэни туппутунан тахсан кэлбитэ. ¹⁸ Онтон уоту дыһайар былаастаах атын Аанньал сиэртибэнньиктэн тахсан, сытыы сиэргэлээххэ туһаайан: «Виноград отоно буспут, сытыы сиэргэбинэн сиргэ баар виноград сүүмэхтэрин быһан ыл», — диэн үөгүлээбитэ. ¹⁹ Аанньал сиэргэтинэн сир диэки далайан сиргэ үүммүт винограды быһа охсон ылбыта уонна Танара уордаахтык тэпсэн сүмэһинин ыгар улуу ньһырыгар бырахпыта. ²⁰ Куорат таһыгар баар сүмэһин ыгар сиргэ виноград ньһыллан бүппүтэ; ол сиртэн тохтор хаан ат үүнүгэр тийэ таһымнаан, отучча көстөөх сиринэн халыйбыта.

Тиһэх сэттэ иэдээн

15 Халлаанга аны атын улуу дьикти бэлиэни — сэттэ тиһэх иэдээн төрдүн илдьэ сылдьар сэттэ Аанньалы — көрбүтүм. Ити сэттэ тиһэх иэдээн кэлэн аастабына, Танара уора-кылына уҕарыахтааҕа.

²Онтон уоту кытта булкуллубут өстүөкүлэҕэ маарынныыр муора баарын көрбүтүм; кыылы, кини мөссүөнүн, бэлиэтин, кини аатын чыыһылатын кыайбыт дыон ол өстүөкүлэ муора үрдүгэр Тангара биэрбит арфатын тутан тураллара. ³Кинилэр Тангара кулута Моисей уонна Агнец ырыатын ыллыыллара: «Оо, Айыы Тойон Тангара, Барытын Тутан Олорооччу! Улуу да, сөбүмэр да буоллаҕа Эн онотуун! Эн суолун барыта көнө, кырдыктаах, оо, сибэтиэйдэр Ыраахтааҕылары!» ⁴Айыы Тойон, ким Эйигиттэн толуро суоҕай, ким айхаллыа суоҕай Эн ааккын? Сибэтиэй соҕотох Эн эрэ бааргын эбээт. Эн кырдыктаах дьүүлүн бары норуокка көһүннэ; омук эрэ барыта кэлэн Эн иннигэр нөрүүн нөргүйүө».

⁵Бу кэнниттэн көрбүтүм — арай халлаанга баар Тангара Дьийэтэ — Туоһулааһын Скинията — арыллан кэлбитэ, ⁶Ол иһиттэн ыраас сырдык лүөн танастаах, түөстөрүн кыһыл көмүс өгнөөх таһаһынан туора бааммыт сэттэ Аанһал сэттэ иэдээн төрдүн илдэ тахсан кэлбиттэрэ. ⁷Онуоха түөрт харамайтан биирдэстэрэ кинилэргэ үйэлэр тухары баар Тангара уора-кылына толору кутуллубут сэттэ кыһыл көмүс кытаҕын туттарбыта. ⁸Тангара кэрэмэн килбиэниттэн, модун кыаҕыттан тунааран тахсар буруо Дьийэ иһин толорбута. Сэттэ Аанһал сэттэ иэдээнэ дьайан бүтүөр диэри, ким да иһирдэ киирэр кыаҕа суоҕа.

Уор-кылын кутуллубут сэттэ кытаҕа

16 Онтон Тангара Дьийэтин иһиттэн ким эрэ күүстээх сангата сэттэ Аанһалга туһаайан: «Барың, Тангара уора-кылына толору кутуллубут сэттэ кытаҕын сиргэ тоҕо анһын!» — диирин истибитим.

²Бастакы Аанһал баран кытаҕын сиргэ сүөкээбитигэр кыыл бэлиэтин ылыммыт итиэннэ кыыл мөссүөнүгэр үгэр-сүктэр дыон эттэрэ бүтүннүү тулуппат ыарыылаах, ирингэлээх ынырык бааһынан бүрүллүбүтэ.

³Иккис Аанһал кытаҕын муораҕа сүөкээбитигэр муора уута өлбүт киһи хаанын курдук буолбута, муораҕа баар хамсыыр харамай барыта имири эстибитэ.

* 15:3 Сибэтиэйдэр Ыраахтааҕылары — сорох былыргы гректии илиинэн суруйууга «үйэлэр Ыраахтааҕылары» эбэтэр «норуоттар Ыраахтааҕылары».

⁴Үһүс Аанньал кытабын өрүстэргэ, сир тымырдарыгар сүөкээбитигэр уу хаанна кубулуйбута, ⁵онуоха уу Аанньалын саныата сөнөдүйбүтэ: «Оо, билигин баар, урут баар Сибэтиэй Айыы Тойон, манньк дүүллээбитинг дынг кырдыктаах. ⁶Сибэтиэйдэр, пророктар хааннарын тохпуттарын иһин, кинилэргэ хааны иһэрдэ биэрдин: итинник дүүллэнэллэрэ бэрт сөптөөх».

⁷Онтон аны сиэртибэнньик иһиттэн атын сана: «Айыы Тойон Тангара, Барытын Тутан Олорооччу, Эн дүүлүн дынг сөптөөх, кырдыктаах!» — диирэ иһилибитэ.

⁸Төрдүс Аанньал кытабын күнгэ сүөкээбитигэр күн бэйэтин уотунан дыону түрүтэ сиэтэр буолбута. ⁹Сыралбан куйаас сырайан, дыон бу алдьархайы ааннатар былаастаах Тангара аатын холуннаран-баһаабырдан барбыттара. Ол тухары хайалара даҕаны аныытын-харатын билинэн кэмсиммэтэҕэ, Тангараны айхаллаабатаҕа.

¹⁰Бэһис Аанньал кытабын кыыл бүрүстүөлүгэр сүөкээбитигэр кыыл бас билэр саарыстыбата харанара түспүтэ, дыон, тылларын быһа ыстыахтарыгар диэри, сору-муну көрбүттэрэ. ¹¹Сору көрөн, баастарын ыарыыта бэрдиттэн халлаанна баар Тангараны үөхпүттэрэ-таныйбыттара, оттон онорбут аныыларын-хараларын кэмсиммэтэхтэрэ.

¹²Алтыс Аанньал кытабын улуу Евфрат өрүскэ сүөкээбитигэр илинтэн, күн тахсар сириг диэжиттэн, кэлэр ыраахтааҕылар суоллара бэлэм буоларын туһугар, өрүс, уута уолан, кумагынан көрбүтэ. ¹³Онтон садаҕа моҕой, кыыл уонна сымыйа пророк айахтарыттан хара баҕаҕа маарынныыр үс быртах тыын оронон тахсан эрэллэрин көрбүтүм; ¹⁴ол дыкти бэлиэлэри онорон көрдөрөр абааһы тыыннара этилэр; кинилэр Барытын Тутан Олорооччу Тангара улуу күнүгэр барыларын кырыктаах кыргыһыыга бииргэ түмээри, бүтүн аан дойду ыраахтааҕыларыгар тахсыбыттара.

¹⁵«Көр бу, Мин уоруйах курдук эмискэ кэлиэҕим. Ким утуйан хаалбатах, таннарды бэлэм сылдыбыт — ол алгыстаах. Кини сыгыннаҕа көстөн саакка киириэ суоҕа».

¹⁶Кинилэр ыраахтааҕылары еврейдии Армагеддон* диэн ааттаах сиргэ муспуттара.

* 16:16 *Армагеддон* — Магедон (Мегиддо) куорат; сорох былыргы гректии илиинэн суруйууга «Армагедон» (Магедон хайата).

¹⁷Сэттис Аанһал кытаһын салгынһа сүөкээбитигэр Танара Дьэитин иһиттэн, бүрүстүөлтэн: «Бүттэ!» — диир күүстээх сана иһилибитэ. ¹⁸Чаһылһан чаһылыһыта, этинг этэн ньириһиппитэ, сана-ингэ ньамаласпыта, сир дьигиһийбитэ; киһи-аймах сиргэ үөскүөбүттэн ыла буолбатах улуу сир хамсааһына этэ ол! ¹⁹Улуу куорат үс аңыы хайа ыстаммыта, омук-омук куората барыта урусхалламмыта. Танара улуу Вавилону умнууга хаалларбатаҕа: урун-кылынын уохтаах арыгытын киниэхэ иһэрдэ биэрбитэ. ²⁰Биир да арыы сир суох буолбута, биир да хайа ордубатаҕа. ²¹Халлаантан түөртүү буут* ыйааһыннаах сүүнэ тобурах дьону тобута түспүтэ; тобураҕы түһэрэн иэдээни онордо диэн дьон Танараны үөбэн-таныһан барбыта. Ол курдук иэнэ биллибэт иэдээн этэ.

Кыылы миинэн олорор содур дьахтар

17 Онтон сэттэ кытахтаах сэттэ Аанһалтан биирдэстэрэ кэлэн миэхэ эппитэ: «Кэл, эйиэхэ элбэх ууга олорор улуу содур дьахтар дьүүллэнэрин көрдөрүөм. ²Сир ыраахтааһылара кинилиин көссүүлэһэллэрэ, сир олохтоохторо кини содур олобун арыгытын итириэхтэригэр диэри иһэллэрэ».

³Тыын миэхэ сайбытыгар Аанһал миигин иччитэх сиргэ илдэ барбыта. Онно тийиэн көрбүтүм — биир дьахтар сэттэ бастаах, уон муостаах, бүүс бүтүннүүтэ Танараны холуннарар аатынан-суолунан бүрүллүбүт уот кыһыл кыылы миинэн олороро. ⁴Дьахтар харанга кыһыл, сырдык уот кыһыл күндү танастааҕа, кыһыл көмүс, күндү таас, чөмчүүк киэргэллээҕэ, содур олобун бары сидьинэ, быртаҕа толору кутуллубут кыһыл көмүс иһитин тутан олороро; ⁵сүүһүгэр «Улуу Вавилон — сир бары содурун, бары сидьинин ийэтэ» диэн кистэлэн суолталаах аат суруллан сылдьара. ⁶Көрдөхпүнэ, дьахтар сибэтийдэр уонна Иисус кэрэһиттэрин хааннарын иһэн итирбит этэ. Кинини көрөн мин бэри диэн бэркиһээбитим. ⁷Тоҕо дьиктиргиигин? — диэбитэ Аанһал. — Мин эйиэхэ ити дьахтар уонна кини миинэ сылдьар сэттэ төбөлөөх, уон муостаах кыылын кистэлэнин этиэм. ⁸Бу көрбүт кыылын баар этэ гынан баран, билигин суох,

* 16:21 *Түөртүү буут* — тылыттан тылыгар түһэрэн тылбаастаатахха, «талант саҕа улахан тобурах». Талант — 26 кг 60 кг тийэ ыйааһыннаах мээрэй.

онтон кэлин түгэбэ биллибэт анхайтан тахсан өлөр өлүүгэ барыаба; ааттара-суоллара аан дойду сабаланыабыттан ыла Олох Кинигэтигэр суруллубатах сир олохтоохторо бу кыылы көрөн сөбүүхтэрэ. Бу баар буола сылдыбыт кыыл билигин суох эрэри, эмиэ кэлиэхтээх.

⁹ Бу мань өйдүүргэ муударай өй ирдэнэр. Сэттэ төбө ити дыахтар олорор сэттэ булгуннабын, ¹⁰ ону тэнгэ сэттэ ыраахтаабыны көрдөрөр; олортон биэс ыраахтаабыта суулбута, биирэ баар, атына өссө кэлэ илик, оттон кэллэбинэ да, уһаабат. ¹¹ Баар буола сылдьан баран, суох буолбут кыыл — ахсыс ыраахтаабы, сэттэттэн биирдэстэрэ, кини өлөр өлүүгэ баран иһэр.

¹² Оттон көрбүт уон муһун — былааһын өссө тутта илик уон ыраахтаабы; бу ыраахтаабыларга кыылы кытта бииргэ биир чаас устата баһылыыр-көһүлүүр былаас бэриллэбэ. ¹³ Бу бары биир соруктаах-сыаллаах ыраахтаабылар буолан, күүстэрин-былаастарын барытын кыылга туран биэриэхтэрэ. ¹⁴ Кинилэр Агнеһы утары охсуһуохтара эрэри, Агнец — тойоттор Тойонноро, ыраахтаабылар Ыраахтаабылара — кинилэри кыайыаба. Танара талан ынйырбыт эрэллээх дьоно Кинини кытта бииргэ сылдыахтара».

¹⁵ Итиэннэ өссө эппитэ: «Эн көрбүт улахан уун, ити содур дыахтар олорор уута, норуоттары, көй дьону, омуктары, араас тылы көрдөрөр. ¹⁶ Оттон кыыл төбөтүгэр көрбүт уон муһун ити содур дыахтары абааһы көрөн туруохтара, барытын бары кураа-нахтаан-эһэн баран бэйэтин сыгыннаах хаалларыахтара, итиэннэ этин-сиинин мэниэстэн баран, уокка уматыахтара. ¹⁷ Танара, Бэйэтин көнүлүн толортороору, кинилэргэ итинник биир өйү-санааны үөскэппит буолан, кинилэр, Танара эппит тыла туолуор диэри, былаастарын кыылга туран биэрбиттэрэ. ¹⁸ Оттон ити көрбүт дыахтарын — сир ыраахтаабыларын баһылаан олорор улуу куорат».

Вавилон сууллуута

18 Бу кэнниттэн сүдү былаастаах атын Аанһал халлаантан түһэн иһэрин көрбүтүм. Кини килбиэннээх сырдыгыттан сир үрдэ сандаара түспүтэ. ² Аанһал күүстээх куолаһа дуораһый-быта: «Улуу содур Вавилон суулунна, суулунна! Кини аны билигин абааһы ордуута, бары быртаах тыын барыта түһэр, бары кирдээх, куһаҥан көтөр барыта түһэр сирэ буолла; ³ кини хаһан

эрэ бары норуоттарга содур олобун уохтаах утабын иһэрдибитэ, сир ыраахтаабылара кинилиин көссүүлэхэн көччүйбүттэрэ, сир-дойду эргисиктэрэ кини улуу баайыттан ылан, эргинэн тиэрэ байбыттара».

⁴Онтон халлаантан атын сананы истибитим: «Кини аныытыгар-харатыгар кыттыспат, буруйугар буруйдаммат туһугар, Мин норуотум, бу куораттан табыс! ⁵Аныыта-буруйа халлаанна тийэ халынаата, онон кини хара дьайытын барытын Тангара өйдөөн-санаан кэллэ. ⁶Эһиэхэ хайдах сыһыаннаспытай да, эһиги эмиэ киниэхэ соннук сыһыаннаһын; тугу онгорбутунан көрөн, икки бүктээн төлөөн; эһиэхэ утах онгорбут иһитигэр икки төгүл ордук уохтаах утахта бэлэмнээн. ⁷Сарыысса буолан олоробун, огдообо буолбатахпын, сору-муну хаһан да көрүөм суоҕа дии саныыр. Онон төһөнөн аатырбытай-сурабырбытай да, төһөнөн баай-дэлэй олоххо көччүйбүтэй да, соччонон үгүс сорго-мунна, кыһалҕаҕа тиксэрин. ⁸Сэтэ-сэлээнэ туолан, өлөр өлүү, ытабыл-сонобул уонна сут кинини биир күн иһигэр ситиэ-ҕэ, бэйэтэ уокка уматыллыаҕа; кинини дьүүллүүр Айыы Тойон Тангара оннук күүстээх».

⁹Кинини кытта көссүүлэспит, баайга-дуолга бииргэ көччүйбүт сир ыраахтаабылара кини умайбыт уотун күдэн буруотун көрөн-нөр аһыйан ытаһыахтара-соноруохтара, айманыахтара, ¹⁰уонна сордонорун көрөн, куттанан тэйиччи туран эрэ: «Оо, күүстээх-уохтаах улуу куорат Вавилон! Сор-мун, сор-мун да буолар эбит эйиэхэ, дьүүлүн чаас иһинэн буола оҕустаҕа!» — дэһиэхтэрэ.

¹¹Сир-дойду атыһыттар эргинэр табаардарын аны ким да атыыласпат буолан, эмиэ кинини аһыйан ытаһыахтара-соноруохтара, айманыахтара. ¹²Кыһыл да, үрүң да көмүс табаары, күндү тааһы да, чөмчүүгү да, күндү лүөн таһаһы, хараһа кыһыл таһаһы, солкону, уот кыһыл таһаһы, араас үтүө сыттаах маһы, слон унуоҕа, күндү мас, боруонса, тимир уонна мрамор оноруктары ким да атыыласпат буолуо; ¹³корицаны, фимиамы, мирраны итиэннэ лааданы, арыгыны, олива арыытын, үчүгэй бурдугу, сэлиэһинэйи, оҕуһу уонна барааны, сылгыны уонна колесницаны, кулуту, атыннык эттэххэ, тыыннаах дууһаны ким да аны ылыа суоҕа. ¹⁴«Дууһан туохха таласпыта барыта мэлийдэ, баайын-дуолун, килбэҥнэс кизбин көстө сүттэ — аны хаһан да ону эргитиэн суоҕа!»

¹⁵ Ити баайынан эргинэн байбыт эргизмсиктэр, киниттэн байбыт атыһыттар кини сордоноро бэрдиттэн куттанан, тэйиччи туран ытаһан-сонгоһон айманан ¹⁶ этиэхтэрэ: «Оо, сор-мун, сор-мун да буолар эбит эйиэхэ, улуу куорат! Күндү лүөнү, хараҥа кыһыл, умайар уот кыһыл таҥаһы кэтэрин, кыһыл көмүһүнэн, күндү таастарынан, чөмчүүгүнэн симэнэрин. ¹⁷ Ол бэйэлээх баай барыта чаас иһигэр күдэнгэ көттөбө!»

Бары хаппытааннар, муоранан айаннааччылар, мотуруостар уонна муора суолунан сылдыар эргизмсиктэр — бары тэйиччи туран ¹⁸ кини умайар уотун буруотун көрө-көрө: «Хайа куорат бу улуу куоракка тэннэһиэ баарай!» — диэн айманаллара; ¹⁹ төбөлөрүгэр күлү куттан баран энэлийэ-энэлийэ, марылааччы ытыы-ытыы үөгүлэхэллэрэ: «Оо, сор-мун, сор-мун да буолар эбит эйиэхэ, улуу куорат! Муораҕа хараабыллаах эрэ барыта эн баайгынан эргинэн байбыта! Ол бэйэн биир чаас иһигэр кураа-нахтаннын!»

²⁰ Үөр-көт, мэнэ Халлаан, үөрүҥ-көтүҥ, сибэтиэй Апостоллар уонна пророктар! Эһигини утары онгорбут бары буруйун иһин кини Танара дьүүлүгэр турда.

²¹ Онтон биир күүстээх Аанһал сүүнэ улахан суоруна моһуоннаах тааһы ылан муораҕа элитэн баран эппитэ: «Улуу куорат Вавилон субу курдук бүтэһиктээхтик — күөрэйбэттии сууларыллаҕа! ²² Аны эйиэхэ арфа да, ханнык да музыка, свирель, турба дорҕооно иһиллиэ суоҕа; аны эйиэхэ уран тарбахтаах мэлийиэҕэ, илии үлэтин идэтэ сүтүөҕэ, бурдук тардар тыас иһиллиэ суоҕа; ²³ Аны эйиэхэ сибэтиинньик сырдыга сандаарыа суоҕа; күтүөт да, сүктэр кыыс да сангата иһиллиэ суоҕа. Ол тоҕо оннугуй диэтэххинэ, эн эргизмсиктэрин аан дойду улуу сололоохторо буолбуттара, норуот эрэ барыта эн алыпкар албыннатан муммута. ²⁴ Пророктар уонна сибэтиэйдэр хааннарыгар, сир үрдүгэр өлөрүллүбүт дьон хааныгар барытыгар — бу куорат буруйдаах».

19 Бу кэнниттэн халлаанга үтүмэн үгүс киһи сангатын санатар ньиргиздээх санга дуораана иһилибитэ: «Аллилуйя! Танарабыт биһигини быһаата! Кини албан ааттаах, сүҥкэн күүстээх! ² Дьүүлүүр дьүүлэ дьын сөптөөх, кырдыктаах: содурунан сир үрдүн сатарыппыт улуу содур дьахтары дьүүлээтэ, кулуттарын хаанын иэстэстэ!»

³ Иккистээн эмиэ: «Аллилуйя! Содур дьахтар умайбыт уотун буруота үйэлэр тухары өрө устар!» — диэбиттэрэ.

⁴ Онуоха сүүрбэ ордугуна түөрт ытык кырдыаҕас уонна түөрт харамай сөһүргэстии түһэн: «Аминь! Аллилуйя!» — дии-дии, бүрүстүөлүгэр олорор Танараҕа сүгүрүйбүттэрэ.

Агнец уонна Сүктэр Кыыс малааһыннара

⁵ Бүрүстүөлтэн: «Танарабытын кулуттара бука бары — Киниттэн толлооччулар, кыра да, улуу да барыта — айхаллаан!» — диир сана дуораһыйбыта.

⁶ Онуоха дохсун уу тыаһыгар, күүстээх этинг ньиргиэригэр хоолоонноох үтүмэн үгүс киһини санатар сананы истибитим: «Аллилуйя! Айыы Тойон Танара*, Барытын Тутан Олорооччу салайар кэмэ кэллэ! ⁷Үөрүөбүҥ-көтүөбүҥ, өрөгөйдүөбүҥ, Киниэхэ уруй-айхал этиэбин! Агнец уруу күнэ үүннэ, кэргэнэ бэлэм буолла. ⁸Сүктэр кыыс кэтэригэр ып-ыраас, сып-сырдык күндү лүөн таҥас бэрилиннэ». (Күндү лүөн таҥас — сибэтиэйдэр кырдыктаах быһыылара.)

⁹ Онтон Аанһал миэхэ: «Сурун: Агнец уруутун малааһыныгар ыңгырыллыбыттар — алгыстаахтар!» — диэбитэ. Итиэннэ өссө эппитэ: «Бу — Танара дьинг кырдыктаах тыла». ¹⁰Сүгүрүйээрибин атабар бокулуоннуу түспүппэр: «Кэбис, итинник гыныма, — диэбитэ. — Мин эмиэ эйигин да, Иисуһу кэрэһиттиир бырааттаргын да кытта бииргэ сулууспалыбын. Иисуһу кэрэһиттээһин — Танара этэрин дьонго биллэрии тыына, онон Танараҕа сүгүрүй».

Үүт маҥан аттааҕы көрүү

¹¹ Онтон мин халлаан арыллыбытын көрбүтүм, арай көрдөхпүнэ, онно үүт маҥан ат турара. Аты миинэн Олорооччу «Эрэллээх уонна Дьиннээх» диэн ааттааҕа. Кини кырдыктаахтык дьүүлүүр, кырдык күүһүнэн кыргыһар. ¹²Хараҕа уот төлөнүн курдук, төбөтүгэр элбэх мэнньиэстээх; аата-суола Киниэхэ сурулла сылдьар да, ол ааты Бэйэтиттэн ураты атын ким да билбэт. ¹³Танна сылдьар таҥаһа хаан буолбут. Кини аата — «Танара Тыла». ¹⁴Кэнниттэн ып-ыраас, мап-маҥан күндү лүөн таҥастаах,

* 19:6 *Танара* — сорох былыргы гректии илиинэн суруйууга «Танарабыт».

үрүн аттаах мэнгэ халлаан сэриилэрэ иһэллэрэ. ¹⁵ Аты миинэн Олорооччу уоһугар норуоттары кыргыахтаах сытыы батастааба. Кини норуоттары тимир торуосканан салайыаба; Кини винограды илдьи тэпсэн, Таһара, Барытын Тутан Олорооччу, уорун-кылынын уохтаах утабын ыган таһаарар. ¹⁶ Таһаһыгар да, өттүгэр да «Ыраахтааһылар Ыраахтааһылар, Тойоттор Тойонноро» диэн аат сурулла сылдыар.

¹⁷ Онтон көрбүтүм, арай биир Аанһал күннэ үктэнэн турара; кини халлаан хаба ортотунан көтөн иһэр көтөрдөргө ньиргиздээх куолаһынан: «Кэлин, — диэн хаһытаабыта, — Таһара тэрийэр улуукан дьоро малааһыныгар мунньустун, ¹⁸ ыраахтааһылар, кыахтаахтар-күүстээхтэр, сэрии тойотторун, сылгылар, хаһаанһыта эрэ бу сылгылары миинэ сылдыбыт дьон өлүктэрин, туох баар көнгүл да, кулут да, кыра да, улуу да дьон өлүктэрин тонсуйан сиэн!»

¹⁹ Көрбүтүм — били кыылы кытта сир ыраахтааһылар сэриилэрин мунһан, аты миинэн Олорооччуну уонна Кини сэриилэрин утары кыргыһаары мустубуттар этэ. ²⁰ Онтон кыыл билиэн түбэспитэ, кинини кытта бииргэ сылдыбыт, араас дыктини көрдөрөн кыыл бэлиэтин ылыммыттары уонна кини мөссүөнүгэр сүгүрүйээччилэри албыннаабыт сымыйа пророк эмиэ тутуллубута. Иккиэннэрин сиэрэнэн уһуура турар уот байдалга тыыннаахтыы бырахпыттара. ²¹ Атытара аты миинэн Олорооччу уоһугар баар батастан өлбүттэрэ; собулҕа аһылыктаах көтөр биийин ууһа кинилэр өлүктэрин тото-хана сиэбитэ.

Тыһыынча сыл

20 Онтон көрбүтүм — түгэбэ биллибэт анхай күлүүһүн тылын кытта улахан сыабы туппут Аанһал халлаантан түһэн иһэрэ. ² Аанһал садаба моҕойу, адьарай уонна сатана буолар былыргы эриэн үөнү тутан ылан, биир тыһыынча сылга сыаптаан ³ түгэбэ биллибэт анхайга бырахпыта; биир тыһыынча сыл бараныар диэри, норуоттары албыннаабатын диэн, үрдүнэн хам бэчээттээн кэбиспитэ. Ол кэмэ аастабына, моҕой кылгас кэмнэ босхолоно сылдыахтаах.

⁴ Онтон мин бүрүстүөллэр туралларын көрбүтүм, ол бүрүстүөллэргэ олорооччуларга дьүүлүүр былаас бэриллибит этэ.

Итиэннэ Иисуһу уонна Танара тылын туоһулаабыттарын иһин, моонньоох бастара быһыллыбыт дьон дууһаларын көрбүтүм. Бу кыылга да, кини мөссүөнүгэр да сүгүрүйбэтэх, сүүстэригэр да, илиилэригэр да кыыл бэлиэтин уурдарбатах дьон этилэр. Кинилэр олоххо төннөн кэлэн, тыһыынча сыл устата Христостуун ыраахтаабылаабыттара; ⁵оттон атын өлбүт дьон, тыһыынча сыл бараныар диэри, тилиннэриллибэтэхтэрэ. Бу — маннайгы тилли. ⁶Алгыстаах сибэтиэй дьон бу маннайгы тиллиигэ тиллэллэр. Иккистээн өлөр куттал кинилэргэ суоһаабат: кинилэр Танара уонна Христос үлэһиттэрэ буоланнар, Кинини кытта бииргэ тыһыынча сыл устата ыраахтаабылыахтара.

Сатана кыайтарыыта

⁷Онтон, тыһыынча сыл аастабына, сатана хаайыытыттан босхолонон тахсан, сир түөрт муннугар баар Гог уонна Магог норуоттары, албыннаан-түөкэйдээн кыргыһыга хомуйуоҕа; бу норуоттар ахсааннара муора кумаҕын курдук аата-ахса биллибэт. ⁸Кинилэр сир киэнг изэнин биир гына ылан, сибэтиэйдэр олорор сирдэрин, Танара тапталлаах куоратын, төгүрүйбүттэрэ; ⁹ол гынан баран халлаантан Танараттан* уот түһэн бэйэлэрин имири сотон ааспыта. ¹⁰Оттон кинилэри албынныы сылдыбыт адьарайы тутан ылан, кыыл уонна сымыйа пророк быраҕыллыбыт умайа турар сиэрэлээх күөлүгэр элиппиттэрэ. Кинилэр үйэлэр тухары түүннэри-күннэри быыстала суох муну-сору көрүүхтэрэ.

Үрүҥ бүрүстүөл Дьүүлэ

¹¹Онтон мин сүдү бэйэлээх үрүҥ бүрүстүөлү уонна ол бүрүстүөлгэ Олорооччуну көрбүтүм; сир-халлаан Кини ньууруттан куотан, аны хаһан да эргийбэттии симэлийэ сүппүтэ. ¹²Көрбүтүм, өлбүттэр — улуу да, кыра да барыта — Танара иннигэр тураллара, иннилэригэр кинигэлэр тэлэччи арыллыбыттар этэ. Өссө биир кинигэни, Олох Кинигэтин, арыйбыттара, онон өлбүттэр кинигэлэргэ хайдах суруллубутунан, тугу онорбуттарынан көрөн дьүүлэммиттэрэ. ¹³Муора бэйэтин түгэбиттэн өлбүттэрин

* 20:9 *Танараттан* — сорох былыргы гректии илиинэн суруйууга бу тыл суох.

таһаарбыта, өлүү уонна аад эмиэ өлбүттэрин биэрбиттэрэ; хас биирдии киһи тугу онорбутунан көрөн дьүүлэммитэ; ¹⁴өлүү уонна аад иккиэн уот байдалга бырабыллыбыттара. Бу уот байдал — иккис өлүү. ¹⁵Олох Кинигэтигэр суруллубатах киһи барыта умайа турар байдалга бырабыллыбыта.

Саҥа сир-халлаан

21 Онтон мин саҥа халлааны, саҥа сири көрбүтүм. Урукку сир-халлаан симэлийэ сүппүтэ, муора эмиэ аны суоҕа. ²Мин, Иоанн, Сибэтиэй Куораты — сүктэр кыыс аналлааһар симэммитин курдук бары силигэ ситэн мэнэ халлаантан, Тангараттан түһэн иһэр саҥа Иерусалимы — көрбүтүм. ³Онтон халлаантан сүнкэн улахан саҥа дуораһыйарын истибитим: «Көр бу, Тангара олоҕо аны киһи аймаҕы кытта бииргэ буолуоҕа. Кини дьону кытта бииргэ олоруоҕа, кинилэр эмиэ Тангара норуота буолуохтара. Кини Бэйэтинэн дьону кытта сылдьан, кинилэр Тангаралара буолуоҕа; ⁴харахтарын уутун хас биирдии таммаҕын сотуоҕа, өлүү-сүтүү диэн аны суох буолуоҕа; энэлгэн, ытабыл-соҕобул, ыарыы эмиэ сүтүөҕэ. Урукку барыта ааста».

⁵Бүрүстүөлгэ Олорооччу: «Көр бу, барыта саҥаны айабын!» — диэбитэ. Онтон миэхэ эппитэ: «Сурун, бу дын кырдыктаах, эрэбил тыл». ⁶Кини миэхэ өссө манныгы эппитэ: «Барыта туолла! Мин Альфабын уонна Омегабын, Төрүппүн уонна Бүтэр Уһукпун. Утаппыкка өлбөт мэнэ уутун дьүүктэтиттэн босхо иһэрдиэм; ⁷кыайааччы итини барытын ылыа, Мин кини Тангарата буолуом, кини Мин уолум буолуо. ⁸Оттон куттамсахтар, итэҕэлэ суохтар, сидьингэр, өлөрүөхсүттэр, содурдар, абынан-хомуһунунан дьарыгырааччылар, эмэгэеккэ сүгүрүйээччилэр уонна бары симыйааччылар аналлара — сиэрэлээх уот байдалга түһүү. Ити иккиһин, бүтэһиктээхтик, өлүү буолар».

Саҥа Иерусалим

⁹Тиһэх сэттэ издээн толору кутуллубут сэттэ кытахтаах сэттэ Аанһаллартан биирдэстэрэ миэхэ кэлэн: «Кэл, эйиэхэ сүктэр кыыһы — Агнец кэргэнин көрдөрүөм», — диэбитэ. ¹⁰Тыын миэхэ сайбытыгар Аанһал миигин сүдү үрдүк хайаҕа таһааран халлаантан, Тангараттан түһэн иһэр улуу куораты, сибэтиэй Иерусалимы, көрдөрбүтэ. ¹¹Ол куорат Тангара килбиэннээх сырдыгынан

сыдыаайар сардангата күндүттэн күндү таастыы, курустаал курдук ыраас яспистыы, күлүмнүүрэ. ¹² Куорат сүүнэ улахан үрдүк истиэнэлээбэ, уон икки халҕан ааннааба, ол ааннарын аайы биирдии Аанһал турара. Халҕаннарга Израиль уолаттарын уон икки аҕатын ууһун аата суруллубут этэ. ¹³ Илин диэки үс халҕан аан баара, хоту үс, собуруу үс, арбаа эмиэ үс халҕан аан баара. ¹⁴ Истиэнэтэ уон икки акылаат үрдүгэр тутуллубут этэ, хас биирдии акылаакка Агнец уон икки Апостолларын ааттара суруллан турара.

¹⁵ Миигин кытта кэпсэппит Аанһал куораты, куорат халҕаннарын, истиэнэлэрин кэмниир кыһыл көмүс ураҕастааба. ¹⁶ Куорат түөрт муннук быһыылааба, устата туоратыгар тэн этэ. Аанһал куораты ураҕаһынан кэмнээбитэ уон икки тыһыынча стадия буолбута; устата, туората уонна үрдүгэ тэн этэ. ¹⁷ Истиэнэтин кэмнээбитэ сүүс түөрт уон түөрт тоңолох буолбута, Аанһал кээмэйин кэрингэ син биир дьон кээмэйин курдуга. ¹⁸ Яспис истиэнэлээх куорат атына барыта дьэнкир өстүөкүлэ курдук ып-ыраас кутуу кыһыл көмүс этэ. ¹⁹ Куорат истиэнэтин акылаата араас күндү таас киэргэтиилээбэ: бастакы акылаат — яспис, иккис — сапфир, үһүс — халцедон, төрдүс — изумруд, ²⁰ бэһис — сардоникс, алтыс — сердолик, сэттис — хризолит, ахсыс — берилл, тохсус — топаз, онус — хризопраз, уон биирис — бирюза, уон иккис — аметист. ²¹ Оттон уон икки халҕана уон икки чөмчүүк этэ: хас биирдии халҕан — биирдии чөмчүүк. Уулуссата — дьэп-дьэнкир өстүөкүлэ курдук ыраас кыһыл көмүс.

²² Куоракка Тангара Дьизэтэ — Храм баарын көрбөтөбүм: Барытын Тутан Олорооччу Айыы Тойон Тангара уонна Агнец Бэйэлэринэн куорат Храма буолаллар. ²³ Тангара килбиэннээх сырдыга сыдыаайар буолан куорат күн да, ый да сырдатарыгар наадыбат; куорат сыдыаайар сырдыга — Агнец. ²⁴ Быһаммыт норуоттар бу куорат сырдыгар сылдыахтара, сир ыраахтаабылара онно бэйэлэрин албан ааттарын, чиэстэрин илдьэ киириэхтэрэ. ²⁵ Халҕан ааннар күнүһүн хатаммакка туруохтара, түүн диэн суох буолуоҕа. ²⁶ Куоракка норуоттар албан ааттара, чиэстэрэ киллэриллибэ. ²⁷ Туох да кирдээх, ким да сидьин, албыны-көлдүүнү тутуспут онно киириэ суоҕа, арай Агнецка баар Олох Кинигэтигэр ааттара суруллубут эрэ дьон киириэхтэрэ.

22 Аанньал миэхэ Танара уонна Агнец бүрүстүөлүн анныт-тан сүүрүгүрдэ сытар, курустаал курдук сып-сырдык, ыпыраас өлбөт мэнэ уутун өрүһүн көрдөрбүтэ. ² Куорат уулуссатын ортотугар уонна өрүс унуор-мангаар өттүгэр сылга уон икки төгүл, хас ый айы ас кутар олох аал луук маһа үүнэн турара; мас сэбирдэбэ норуоттары үтүөрдэр аналлааба. ³ Куоракка аны кыраммыт диэн туох дабаны суох буолуоҕа; онно Танара уонна Агнец бүрүстүөлэ туруоҕа, итиэннэ Танара кулуттара Киниэхэ сулууспалыахтара. ⁴ Кинилэр Танара сирэйин көрүүхтэрэ, Танара аата сүүстэригэр суруллан сылдыаҕа. ⁵ Түүн диэн онно суох буолуо, Айы Тойон Танара кинилэри сырдатар буолан ханнык да уокка, күн уотугар да наадыһахтара суоҕа. Кинилэр үйэлэр тухары ыраахтааҕылаан олоруохтара.

Христос кэлиитэ

⁶ Аанньал миэхэ эппитэ: «Бу сөптөөх, дынг кырдыктаах тыл; сибэтиэй пророктар Айы Тойон Танаралара сотору кэминэн туох буолуохтааҕын кулуттарыгар көрдөрөөрү, Аанньалын ытта».

⁷ «Көр бу, Мин сотору кэлиэм: ким бу инникини төлкөлүүр кинигэ тылын тутуһар, ол алгыстаах!»

⁸ Мин, Иоанн, маны барытын илэ бэйэбинэн көрбүт-истибит киһи буолабын. Барытын көрөн, ситэри истэн баран ону көрдөрбүт Аанньалга сүгүрүйээрибин, атаҕар бокулуоннуу түспүтүм. ⁹ «Кэбис, итинник гыныма, — диэбитэ кини. — Мин эйигин, эн пророк бырааттаргын уонна бу кинигэ тылын тутуһаачылары кытта бииргэ Танараҕа сулууспалыбын, Танараҕа сүгүрүй!»

¹⁰ Итиэннэ эппитэ: «Бу кинигэ билиннини да, кэнэбэһи да төлкөлүүр тылын хам бэчээттээн кэбиһимэ. Болдьохтоох кэм чугаһаата. ¹¹ Аньыылаах өссө да аньыыны оноро түстүн, кирдээх өссө киртийдин, кырдыксыт кырдыгы оноро түстүн, сибэтиэй өссө ырааһырдын».

«¹² Көр бу, Мин сотору кэлиэм! Хас биирдиигэ тугу онорбутунан көрөн биэрэрдии, төлөбүрбүн илдьэ кэлиэм. ¹³ Мин Альфа уонна Омега, Төрүт уонна Бүтэр Уһук, Бастакы итиэннэ Тиһэх буолабын».

¹⁴ Кини кэриэстэрин тутуһааччылар* алгыстаахтар. Кинилэр олох аал луук маһыттан амсайар бырааптаахтар, куорат аанынан киирэр кыахтаахтар. ¹⁵ Оттон ыттар, абынан-хомуһунунан дыарыгырааччылар, содурдар, өлөрүөхсүттэр, эмэгэчкэ сүгүрү-йээччилэр уонна сымыйаны таптааччылар, сымыйаны онгорооччулар — олох бары куорат тас өттүгэр хаалыахтара.

¹⁶ «Мин, Иисус, бу туһунан эһиэхэ сэттэ церковка туоһулаттара Аанһалбын ыттым. Мин Давид силиһинэбин, сарсыардаангы сырдык сулуспун».

¹⁷ Тыын уонна Сүктэр Кыыс иккиэн: «Кэл!» — диэн ыңыраллар. Истибит эрэ барыта: «Кэл!» — диэн ыңырыахтын. Утаппыт кэлиэхтин, иһиэн баҕалаах кэлэн, өлбөт мэнэ уутун босхо ылыахтын!

¹⁸ Мин бу билингини да, кэнэҕэһи да төлкөлүүр кинигэ тылын истээччини сэрэтэбин: ким эрэ бу тылга тугу эмэ эптэҕинэ, Танара ол киһини бу кинигэҕэ этиллибит иэдээннэ тиксэриэҕэ; ¹⁹ оттон ким эмэ бу кинигэ билингини да, кэнэҕэһи да төлкөлүүр тылыттан тугу эмэ көбүрэттэҕинэ, Танара кинини бу кинигэҕэ этиллибит Олох Кинигэтигэр суруллар, сибэтиэй куоракка киирэр аналлыттан матарыаҕа.

²⁰ Бу маны Кэрэһиттээччи этэр: «Дьин чахчы, Мин сотору кэлиэм!»

Аминь, оо, кэл, Айыы Тойон Иисус!

²¹ Айыы Тойоммут Иисус Христос** илгэлээх үтүөтэ барыгытын кытта эңгээрдэһиэхтин. Аминь.

* 22:14 *Кини кэриэстэрин тутуһааччылар* — сорох былыргы гректии илиинэн суруйууга «танастарын сууна сылдыааччылар».

** 22:21 *Айыы Тойоммут Иисус Христос* — сорох былыргы гректии илиинэн суруйууга «Айыы Тойон Иисус», «Иисус Христос»; *барыгытын кытта* — «барыбытын кытта», «сибэтиэйдэри кытта» эбэтэр «Кини бары сибэтиэйдэрин кытта».